

**AUKUSO 12, 2018**

**MATAUPU 1: O le Atua foafoa.**

**TUSI FAITAU: Kenese 1: 1-31**

**SINI: Ia malamalama le fanau; o mea lelei uma lava na faia e le Atua i le amataga.**

**Faiaoga #1:** Fa'afeiloa'i tamaiti/ tatalo amata/ fa'ailoa le mataupu o le asō.

**Faiaoga #2:** Faitauina o le Tusi Paia/ fa'amalamalama ni upu e le o malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

I le amataga o le foafoaga na faia e le Atua le lagi ma le lalolagi. O loo fa'amatalaina e le tala o le foafoaga sa soona nunumi ma gaogao mea uma.

- O le Atua na fetalai ane ona i ai lea o mea uma. O lo'o fa'aalia mai ai foi le matautia o le Atua ma lona silisiliese.
- O le Atua e pule aoao i mea lelei uma lava, ma o le isi fo'i lea fa'amatalaina o le Atua i le Tusi Paia; o le Atua foafoa, o le mataisau o le foafoaga.

### **O aso e fitu ma mea na tutupu ai.**

- **Aso muamua.** [Kenese 1: 3-5] “Ua fetalai mai le Atua, ia malamalama; ona malamalama ai lea. Ona tu'u eseese ai lea e le Atua o le malamalama ma le pouliuli. Ua fa'aigoa e ia le malamalama o le ao, a'o le pouliuli o le po.”
- \* **Aso lua.** [Kenese 1: 6-8] “Ua fetalai mai foi le Atua, ia i le va o vai le va nimonimo, e va a'i isi vai ma isi vai.”
- \* **Aso Tolu.** [Kenese 1: 9-13] O le aso tolu na faia ai e le Atua le sami, le eleele, le vao mua, laau ma laau e a'ina Ona fua.
- \* **Aso Fa.** [Kenese 1: 14-19] Na faia e le Atua le la o le malamalama tele e susulu i le ao. A o le malamalama itiiti i le po ma fa'aigoa o le masina ma fetu.
- \* **Aso Lima.** [Kenese 1: 20-23] O le lima o aso na faia ai e le Atua mea ola fetolofi uma o le sami ma manu felele i luga o le laueleele. Ua mae'a ona fa'amanuia ai lea o le Atua i mea ola o le sami atoa ai ma manu felele o le laueleele.[f.22]
- \* **Aso Ono.** [Kenese 1: 24-31] O le aso mulimuli i galuega a le Atua; na ia faia ai mea ola uma i le laueleele e taitasi ma lona uiga, o manu vaefa fanua, ma mea fetolofi, ma manu vaefa o le vao.

- Ae fa'amuliga ana galuega uma i le faia o le tagata. Fai mai le molimau a le tusitala o Kenese; o le fa'atusa o le Atua na faia ai le tagata, ma o ulua'i tagata i le foafoaga o Atamu ma Eva.

- \* **Aso Fitu.** O le aso fitu na malolo ai le Atua ile foafoaina o le foafoaga. O le uiga o le numera 7 i le gagana Eperu [wholeness] po'o le atoaga. O lona uiga ua atoatoa ona lelei ma matagofie le foafoaina o mea uma o le foafoaga [complete].

### **Aoaoga:**

Ia mau pea lo tatou fa'atuatuaga o le Atua na faia le lagi ma le lalolagi ma mea lelei uma mo le tagata. Na faia foi e le Atua le tagata i lona fa'atusa, ma aveai ai ma tausii mea a le Atua i lana foafoaga. Aua nei galo

ona fa'afetaia le Atua i mea lelei ua ia faia mo i tatou. Fa'afetai mo le foafoaga ua fai ma o tatou si'osi'omaga lelei.

\*\*\*\*\*

**AUKUSO 19, 2018**

**MATAUPU 2: O le ulua'i tagata i le foafoaga.**

**TUSI FAITAU: Kenese 2: 7, 8, 15-23**

**SINI: Ia malamalama le fanau o le Atua na faia le tagata.**

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'aailoa le mataupu o le aso/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O le foafoaina o le uluai tagata na faia e le Atua i lona faatusa, ma sa faaogaina e le Atua le foafoaga e faia ai le tagata.

- *[f.7]* O le efuefu [*dust*] o le laueleele na faia ai e le Atua le tagata, ma mānava ai loa ma le mānava ola ona avea lea o le tagata ma tagata ola.
  - Mānava ola: o le mea foai fua a le Atua; o le ola e patino i le Atua.
- O le uluai tagata o Atamu o le tamaloa sa fai ma leoleo, aemaise le galueaina o le fanua. Fai mai le molimau a le Tusitala o Kenese; ua silasila atu le Atua e lē lelei ona toatasi o le tagata; ou te faia sona fesoasoani. *[f.21]* Ua fa'amoegase e le Atua Atamu ona toina lea e ia le tasi ona ivi asoaso [*rib*], ua na fai ai le fafine. O le igoa o le fafine o Eva.
  - Atamu: o le elelee
  - Eva: o le ola

\* Ua fai i laua ma tagata e tausia le foafoaga matagofie na faia e le Atua. Ua fa'aigoa foi e Atamu mea ola uma i lona igoa.

\* E aai foi i la'ua i laau uma o le fa'atoaga; vagana ai le laau e tasi, o le laau e iloa ai le lelei ma le leaga, e sã ona la aai ai pe pa'i ai foi. Aua o le aso lava lua te aai ai i le laau lua te feoti ai lava.

### **A'oa'oga:**

Na faia e le Atua tagata uma i lona fa'atusa, o le mea lea e ao ona malamalama ai le fanau le talitonuga fa'a-kerisiano. Ia toe fa'amanatu i le fanau fesili masani o le fa'atuatuga fa'a-kerisiano lea o lo'o a'oa'oina i le aoga Samoa a le Faifeau.

1. O ai na faia oe?..... O le Atua.
2. O ai lou Fa'aola? ..... O Iesu Keriso.

Ia ma'ea le mataupu ua malamalama lelei tamaiti i Lē na faia le tagata, ma le mea na fausia mai ai. Aemaise le mafuaaga tatau na faiai le tagata ma palealii o ana gaulega mamana. Ae le gata i lea, o le tagata o le tausii mea a le Atua; e leoleo ma tausia le matagofie o le foafoaga ina ia faatumauina

.....

**AUKUSO 26, 2018**

**MATAUPU 3: Kaino ma Apelu.**

**TUSI FAITAU: Kenese 4: 1-10**

**SINI: Ia malamalama le fanau le taua o le ola fa'amagalo.**

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

**Fesoasoani mo le Faiaoga:**

Ina ua tuliese e le Atua le ulua'i tagata mai le fa'atoaga i Etena, ae le i mavae ai le alofa taumulimuli o le Atua. Na mulimulitai lava le Atua ona o lona alofa i le tagata na na faia. Peitai na la'ua galueaina le isi fanua ma atina'e ai lo la aiga. Ua o'o ina maua e Atamu ma Eva ni tama tane se to'alua.

- **Kaino**
  - ~ o le ulumatua a Atamu ma Eva
  - ~ o le galue fanua, po'o le fai fa'atoaga.
- **Apelu**
  - ~ o le u'i i le fanau a Atamu ma Eva
  - ~ o le leoleo lafu manu

Fai mai le tala e uiga eseese amio o le au uso lenei o Kaino ma Apelu. O lona uiga e foliga mai e le lelei lo la va fa'a-le-uso, e i ai le feitana'i. O le tasi o aso na saunia o ā la taulaga ma avatu i le Atua. O Kaino na avatu ni fua o le fanua, a'o Apelu na avatu le manu lelei ma le peti e fai ai lana taulaga. Ua talia e le Atua le taulaga a Apelu, ae leai le taulaga a Kaino. Ua tupu ai le ita i le loto o Kaino, ma ua avea lona ita ma mea ua ia fasiotia ai lona uso.

Ua silasila mai le Atua ua mata fa'anoanoa lava Kaino, ona fesiligia lea e le Atua le mafuaaga ua fa'anoanoa ai. Peitai na natia e Kaino le mea ua tupu ma le lilo i lona manatu e le o silafia e le Atua. Aua fo'i o le Atua e ati Lana silafaga i mea uma lava, e o'o fo'i i ō tatou loto ma ō tatou mafaufauga lililo e silafia e le Atua. O le mafuaaga lea na fa'asala ai e le Atua Kaino e fa'asevasevaloaina i le laueleele, ae toe foai le tama tane ia Atamu ma Eva e sui tulaga ia Apelu; ua fa'aigoaina ia Setu.

E le fiafia le Atua i le tagata e le fa'aalia le alofa i totonu o le aiga, le nu'u, le aoga, ma le ekalesia. Aua o le mea moni lava o le isi lea natura e iloga ai lo tatou Atua i le tala fa'asolopito o le Tusi Paia. Aua o le Atua o le alofa fua ma le alofa mutimutivale.

**A'oa'oga:**

Ia a'oa'oina fanau ia maua le loto alofa o le tasi i le isi, aemaise lava le va o le uso i le uso ma le tuagane i le tuafafine. Ia iloa fo'i ona pulea lona loto i totonu o le aiga. E le gata i lea, o le va tapuia o le tama ma le teine i totonu o le aiga Samoa. Tamaiti e taua le nonofo fealofani i totonu o aiga nu'u ma le ekalesia, aua e atagia mai ai le alofa o le Atua. Ae aua nei pei o le tama o Kaino; na matua'i lē atagia mai lava le uiga faa-le-Atua o le

“alofa” i lana mea sa fai i lona uso. Fai mai Iesu i lana lauga i luga o le mauga; [Mataio 5: f.7 & 9] “Amuia ē alolofa atu; auā e alofaina mai i latou. Amuia ē faatupuina le filemu; auā e ta’ua i latou o atalii o le Atua.”

---

**SETEMA 02, 2018**

**MATAUPU 4: O le nuanua o le folafolaga [Promise],[Aso Sa Talalelei]**

**TUSI FAITAU: Kenese 9: 8-17**

**SINI: Ia malamalama le fanau i le uiga moni o le nuanua o le talalelei.**

**Faiaoga #1:** Tatalo Amata/ toe fa’amanatu le mataupu le Aso Sa ua tuana’i/ fa’ailoa le mataupu o le asō/ fa’afeiloa’i tamaiti.

**Faiaoga #2:** Faitauina o le Tusi Paia/ fa’amalamalama ni upu e le malamalama ai le fanau.

**Fesoasoani mo le Faiaoga:**

O le asō o loo fa’amanatu ai i le ātu Samoa le to’ai taunuu mai o le talalelei i ona laufanua. O le tala e fou i le fa’alogo i a Samoa ma ona tagata.

- 1830
  - I le tausaga 1830 i le masina o Aukuso 22; na taunuu manuia mai ai le malaga i le gataifale o Sapapalii, Savaii le nuu o Malietoa Vainuupo. E to’ai taunuu mai la le malaga o loo tau le taua i Upolu i le va o Malietoa Vainuupo ma le alii ta’uta’ua o Tamafaiga.
  - Fai mai na fetai’ai le au malaga ma se tagata o loo alo atu lana paopao; ma fesiligia po o i ai se mea ua tupu ua afua ai ona asu fa’asoloatoa laufanua o Samoa. Ae fa’apea mai le tali a lē na alu ane i le paopao; “ua mate le tevolo.”
  - I le aso 23 o le aso na soso’o ane ai; na taunuu ane ai Malietoa Vainuupo ma talia aloaia ai le savali o le talalelei. O le aso foi lea na saunoa ai le Malietoa; “o le a ave uma le mamalu i le Atua”, ma suia ai lona igoa ia Malietoa Tavita.
- O le igoa o le va’a
  - O le Sāvāli o le Filemu.
- O i latou na omai i le va’a.
  - O le ta’ita’i malaga o Rev. Ioane Viliamu, Rev. Salesa Papu, 8 Misionare mai Tahiti, Ulugalii Samoa o Faueā ma Puaseisei
  - 1832 Taunuu mai ai le talalelei i Tutuila i le afioaga o Leone, ma e taunu’u mai Ioane Viliamu ma le au-malaga ua leva ona fa’atali atu le nuu o Leone mo le talia aloaia o le faiga-malaga. E mafua ona o le tautua a le alii o Amoamo; i lona malaga atu i Upolu ma le toe foi mai ma a’oa’oina tagata i le talalelei ia Iesu.

O le fa’ai’ui’u o le tala i le lolo lea e afua ai le mataupu o le asō. Fai mai le molimau a le tusitala o Kenese; o le ma’ea ai o le lolo na osi feagaiga ai le Atua ma Noa e ala i le nuanua. E le gata la ia Noa ae fai mai e autupulagā lea folafolaga e fa’avavau. O le folafolaga e le toe oo ai se lolo i le lalolagi. O le isi lea tala o loo atagia ai le talalelei, aua o loo fa’auau lona lelei e fa’avavau. O le talalelei o le tala i se mea lelei ua faia. O le tala e manatua pea le lelei o loo i ai.

O le lelei la o lenei tala, ina ua fa’avae le fetalaiga a le Atua i le osiga feagaiga ma le lalolagi. Ae le gata i lea na faia e le Atua le fa’ailoga vaaia o lea osiga feagaiga e ala i le nuanua. Fetalai le Atua a vaaia le nuanua e fa’amanatu mai ai ia te ia lana osi feagaiga ma le lalolagi, ma e fa’atumauiina lea e fa’avavau.

**A’oa’oga:**

O le nuanua [rainbow] o le fa'ailoga o le folafolaga a le Atua mo le lalolagi. Fanau e mafua ona lelei le tala ina ua auai le Atua. O le talalelei foi lea na faia ai e le Atua le nuanua ma fa'ailoga vaaia e oo mai lava i le asō. Toaga e talai le talalelei ia Iesu Keriso e ola ai ni agaga, ae le o le fa'amaumau o le ola i mea le aoga. O le talalelei lava ia e taulai i le taulaga na ofo atoatoa mai ai e le Atua lona Alo mo le lalolagi. [Ioane 3: f.16] “*Auā ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia , a ia maua e ia le ola faavavau.*”

---

**SETEMA 09, 2018**

**MATAUPU 5: O le valaauina o Aperaaamo**

**TUSI FAITAU: Kenese 12: 1-4**

**SINI: Ia iloa ma malamalama le fanau; o le ola talitonu ma fa'atuatua i le Atua e manuia ai la'asaga uma o le tagata.**

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

**Fesoasoani mo le Faiaoga:**

O le mataupu o lenei taeao ua fa'auupuina; “o le valaauina o Aperaaamo.” Fa'amatala le uiga o le upu “valaauina” po'o le fa'aperetaniaina “calling.”

- **Calling:**

-a strong urge toward a particular way of life or career; a vocation.

- **Valaauina:**

-o le valaau e fa'atino se fa'amoemoe taua ina ia fa'ataunuuna.

-o le valaauina o le mea mai le Atua; e fa'aaogaina ai le tagata, ae fa'ataunuuna e le Atua.

**\* Aperaaamo:**

-tupuga mai ia Noa

-fa'aigoaina fa'amataupu silisili; “o le Tamā o le Au-Fa'atuatua.”

-o le tagata talitonu ma fa'atuatua i le Atua.

-o le tagata fo'i e le i fesiligia lona valaauina po'o fea e aga'i i ai, na ona tulai gugu lava ma alu. [Ken.

12]

-o le valaauina o Aperaaamo na ō mai fa'atasi ma le folafolaga ma fa'amanuiaga.

**Folafolaga ma fa'amanuiaga: (Promise and Blessing)**

- **Folafolaga/ Promise:**

-o se mea ua folafola mai e fa'ataunuuna i le lumana'i.

- **Fa'amanuiaga/ Blessing:**

-o se manuia o le a foai e le Atua i le olaga o le tagata.

O le valaauina o Aperaaamo o le mea mai le Atua; e le mai se tagata. O le mafuaaga fo'i lea na le masalosalo ai Aperaaamo i le feau ua aumai, ona o lo'o ta'imua i ai le Atua. O le ala fo'i lea na tulai gugu ai ma alu ona ua mautinoa e Aperaaamo; o le valaau e o mai fa'atasi ma fa'amanuiaga. [f.4] Ou te faia oe ma nu'u tele, ou te matuā fa'amanuia foi ia te oe.

**A'oa'oga:**

---

O le Atua e fa'amanuia i le tagata e tumau lona fa'atuatua ia te ia. Fanau, o fa'amanuiaga o le mea e patino i le Atua, ae mafai ona tatou mauaina pe a moni ma fa'amaoni lo tatou ola fa'atuatua ia te ia.

---

## SETEMA 16, 2018

**MATAUPU 6: O le tama o le folafolaga.**

**TUSI FAITAU: Kenese 21: 1-7**

**SINI: Ia malamalama le fanau o le folafolaga o le mea e fa'ataunu'uina e le Atua.**

**Faiaoga #1:** Tatalo Amata/ toe fa'amanatu le mataupu o le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

### Fesoasoani mo le Faiaoga:

O le mataupu o lenei taeao; "o le tama o le folafolaga." E umi se taimi sa fa'atalitali ai Aperamo ma Sarai i le fa'ataunu'uina o le folafolaga, lea na folafola mai e le Atua i le amataga o le valaauina o Aperamo. E silia ma le 20 tausaga o fa'atalitali, ae fa'atoā fa'ataunu'uina le folafolaga I le tama o Isaako. O le umi o le fa'atalitali o Aperamo ma Sarai, na manatu ai o i laua e fa'ataunu'uina le folafolaga. Lea na la faia ai le auala sese, ma aumai ai le auauna fafine a Sarai o Akara e fa'ataunu'u ai le folafolaga. Peita'i o o tatou manatu, e le o le finagalo lea o le Atua. O le Atua e folafola, o ia fo'i na te fa'ataunu'uina.

- **Aperamo ma Sarai:**
  - O le tupuga o le nu'u tele
  - Sapi i manuia mai le Atua
- **Akara:**
  - O le auauna fafine a Sarai le ava a Aperamo. Fa'aaogaina o ia e taumafai e fa'ataunu'u ai le folafolaga mai le Atua. Ae le o se auala sa'o le fa'atinoga, aua e le o le tagata a'o le Atua.
  - Fanaua le ulumatua o le suli o Aperamo ma fa'aigoa ia Isamaeli.
- **Folafolaga/ Promise:** [ou te faia oe ma nu'u tele (Ken. 12 f.)]
  - O le folafolaga o le mea mai le Atua e fa'ataunu'uina e le Atua.
  - Tama o le folafolaga ua fa'aigoa ia Isaako, lea na fa'amanuia ai le Atua ia Aperamo ma Sarai. O le tama na te fa'aauuina le gafa a Aperamo a o le tupuga o le nu'u tele o Isaraelu.
  - O le fanau mai o Isaako na fai ma mitamitaga i loto o Aperamo ma Sarai ina ua taunu'u le folafolaga mai le Atua.

### Aoaoga:

Ia tatou maua le loto fa'atalitali i le Alii, ae aua nei fiu gofie ma musuā. Ia tatou manatua o le folafolaga mai le Atua e fa'ataunu'uina lava e le Atua. E fa'aaogaina e le Atua I tatou e fa'ataunu'u ai ana folafolaga, ae le o i tatou.

---

## *Malologa mo le Lotu a Tamaiti (Setema 30- Oketopa 28, 2018)*

\*\*\*\*\*

## OKETOPA 28, 2018

**MATAUPU 7: O Isaako ma Repeka.**

**TUSI FAITAU: Kenese 24**

**SINI: Ia malamalama le fanau o le filifili fa'atasi ma le Atua e maua ai manuia.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

### **Fesoasoani mo le Faiaoga:**

O le mataupu i lenei taeao ua fa'aupuina; “o Isaako ma Repeka.” E mafai fo'i ona toe fa'aupuina e fa'apea; “ua talagafa le tama o le folafolaga.” Fai mai le molimau o le tusitala o Kenese; ua mavae tausaga e 3 talu le maliu o Sara, ona auina lea e Aperamo o Elisara lana auuina i le aiga o lona uso o Nakori I Mesopotamia ina ia maua se avā mo lona atali'i o Isaako.

- **Aperamo:** o le tama sili
  - Suia lona igoa ia Aperamo o lona uiga “o le tama o le vao nu'u.”
  - O le tamā o le Au-Fa'atuatua
  - Na valaauina e le Atua e fa'ataunu'u lana folafolaga
  - Nonofo ma Sarai o lona uiga “o lo'u sa'o tama'ita'i” suia lona igoa ia Sara o lona uiga “o le sa'o tama'ita'i.”
  - Fanaua Isaako le tama o le folafolaga; o le uiga o lona igoa “o ataata.”
- **Isaako:** o ataata.
  - O le tama o le folafolaga.
  - Nonofo ma le afafine o Petueli le atalii o Nakori le uso o lona tamā o Aperamo, le tama'ita'i o Repeka. Ua fa'atasi i laua ina ia fa'auuina le folafolaga ma le fa'amanuiaga mai le Atua.
  - Na ia i laua ma Repeka se masaga tama o Esau le ulumatua ma Iakopo le ui'i.

### **A'oa'oga:**

O filifilia o Repeka e fai ma avā a Isaako e le o se filifiliga na fa'a-le-tagata ona fai, na filifili fa'atasi ma le Atua. Aua e pei lava ona molimauina i le tala ia Aperamo, o le Atua e folafola o le Atua fo'i na te fa'ataunu'uina. O le filifiliga o le mea e patino lava i le tagata lona fa'atinoga, ae a filifili fa'atasi ma le Atua ona manuia lea o lona taunu'uga. O le mafuaaga fo'i lea na manuia ai la'asaga o Isaako ma Repeka, ona sa mau pea le fa'atuatuaga i le Atua soifua.

.....

**NOVEMA 04, 2018**

**MATAUPU 8: O Iakopo ma Esau.**

**TUSI FAITAU: Kenese 25, 27, 28**

**SINI: Ia malamalama le fanau i le taua o le nonofo fealofani.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

### **Fesoasoani mo le Faiaoga:**

O le tala i lenei taeao o le fa'auuina o le folafolaga mai le Atua, ma ua fa'aulutalaina ia Iakopo ma Esau. Ua mavae tausaga e lusefulu talu ona fa'atasi ai Isaako ma Repeka, ona fanau lea o le masaga tama o Esau le tasi, a o Iakopo le tasi.

- Esau: o le uiga o lona igoa o fulufulua.
  - E mafua ona uiga ia fulufulua, ona sa fanau mai e fulufulua lona tino atoa

- E loto tele ma ua poto e tulimanu, ma o ia fo'i o le pele a lona tamā.
- O ia fo'i o le ulumatua a Isaako ma Repeka.
- O le aganu'u ma le tu fa'a-Isaraelu e tāua ai le tofi o le ulumatua
  1. O le mamalu ma le pule i ona uso.
  2. E maua e ia vaega e lua o le oloa a lona tamā.
  3. E fai o ia ma osi taulaga i le aiga, pe a malaga ese, pe maliu fo'i le tamā o le aiga.
- Iakopo: o le uiga o lona igoa "o le u'u mulivae.
  - E mafua mai i le taimi na fananau mai ai i laua i le manava o Repeka. Fai mai le tala a o muamua mai le tama o Esau i fafo, ae o lo'o u'u mai e Iakopo le mulivae o Esau.
  - O Iakopo o le tagata agamalu ma tausa'afia ona uiga, ma o ia fo'i o le peleia o lona tinā.
  - O le tagata sa faoa le tofi o le ulumatua i le la togafiti ma lona tinā.

Ua o'o i le tasi aso na sau Esau mai i le vao ua lailoa o ia, ma na iloa ai Iakopo o lo'o sauniuni le meaai. Ua ole Esau i lona uso e avane se meaai aua ua lagona lona vaivai ma lona matelaina i le fia ai. A ua fai atu Iakopo ia te ia; ou te avatu ia te oe se mea e 'ai pe a fai e fa'atau atu le tofi o le ulumatua ia te ia. O le 'ai e tasi ua aveesea ai le tofi taua o le ulumatua.

Na saunia e Repeka le togafiti e maua ai e lana tama o Iakopo le tofi o le ulumatua, aemaise o fa'amanuiaga o le a fa'amanuia mai ai lona tamā o Isaako ia te ia. Ua fai le ofu fulufulu mai i le pa'u o le manu. Ina ua fa'ataunu'uina le togafiti, na le mautonu le toeaina o Isaako i le tagata lea e alu atu; pe a fua i ana upu nei. [Ken. ] "E te tino ia Esau, ae leo ia Iakopo." O i fo'i na tupu ai le feeseesea'iga o le au-uso, ina ua fo'i atu Esau ua uma manuia ae toe na o malaia.

Peita'i e le i muta ai taumafaiga a Repeka i lana pele o Iakopo, na ia fa'asola i Patanarama o lo'o i ai lona tuagane o Lapana ma su'e ai sona to'alua. Ua faiava Iakopo i afafine a Lapana e ala i le la feagaiga na osia e ala i lana auaunaga, ma ua fa'atupulaia le to'atele o tagata na tupuga mai ia Iakopo.

Ua o'o i le taimi e toe fo'i ai Iakopo i lona nu'u, ma ua logo tala i ai Esau lona uso; ona tulai lea o ia ma alu e fa'afetai'ai ia te ia i le ala. O le mea manaia na tupu i le fetaiaga a le au-uso i le ala, na toe maua ai le fa'aleleiga.

### **A'oa'oga:**

O le mea e saunia e le Atua e taunu'u i se taunu'uga lelei. Na toe fo'i Iakopo ma le loto popole i lona nu'u ona o lona uso sa tau lamalama e fasioti ia te ia. Ae peita'i ! na saunia e le Atua auala lelei mo Iakopo i le fa'ataunu'uina o lana folafolaga. Fanau e taua le loto fefa'amagaloa'i o le tasi i le isi e tupu ai le alofa i o tatou loto. O le auala le na na saunia e le Atua i le feiloaiga a lenei au-uso; e ese le mea na mafaufau ia ai Iakopo, ae ese le mea na tupu i le feiloaiga. Ina ua sau Esau ma le loto fa'amagalo ma feiloai fiafia ma lona uso ua leva ona valavala. Ioe, o ala o le Atua e le o ala ia o le tagata.

\*\*\*\*\*

**NOVEMA 11, 2018**

**MATAUPU 9: Fa'aipoipo atu Iakopo ia Rasela.**

**TUSI FAITAU: Kenese 29: 1-28**

**SINI: Ia malamalama le fanau o Iakopo na fa'aauuina le folafolaga a le Atua.**

**Faiaga #1:** Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le aso/ fa'afeiloa'i tamaiti

**Faiaga #2:** Faitauina o le Tusi Paia/ fa'amalamalama ni upu e le malamalama ai le fanau.

**Fesoasoani mo le Faiaga:**



O le mataupu o lenei taeao; fai mai ua fa'aipoipo atu Iakopo ia Rasela. Manatua fo'i e outou tamaiti le mataupu o le vaiaso ua te'a, [fa'atali mo se tali a le fanau] lelei. O le tala ia Esau ma Iakopo le masaga tama a le toeaina o Isaako ma Repeka. O le ulumatua o Esau a'o le ui'i o Iakopo. A ua faoa e Iakopo le tofi o le ulumatua mai ia Esau i le 'ai e tasi, ae le gata i lea, a ua toe fa'amanuia i ai lona tamā o Isaako. Manatua fo'i e outou le fanau le sola'aga a Iakopo ina ua iloa e Iakopo le ita o lona uso o Esau ia te ia, lea na sola ai i le aiga o le tuagane a lona tinā.

Ina ua o'o Iakopo i Patanarama i le nu'u o Lapana sa ia malolo i le tasi o vai'eli. Ae ia vaai ai se tama'ita'i lalelei o alu ane e fainu lana lafu manu, ma o ia fo'i o le leoleo mamoe a lona tamā. Fai mai le molimau a le tusitala ua mo'omo'o i ai le loto o Iakopo ia Rasela.

Ua o'o ina avee Iakopo ma fagamanu ia Lapana, ona o le feagaiga na osia a Iakopo ma Lapana, o le a ia auauna ia Lapana i tausaga e 7 ona o Rasela. A ma'ea tausaga e 7 ona avane lea o Rasela e fai mona āva, peita'i na olegia e Lapana Iakopo ina ua ma'ea tausaga e 7 ona avane lea e Lapana o Lea e sui ai Rasela. Peitai e le i mafai ona aveese ai lagona o Iakopo o lo'o mo'omo'o lava ia Rasela. Ua ia toe auauna fo'i i isi tausaga e 7 mo Rasela.

Ua o'o ina nonofo o Rasela ma Iakopo ma fanau ai se tama tane ma ua fa'aigoa ia te ia o Iosefa. O Iosefa na manuia ai lo latou aiga aemaise le tupuaga o Isaraelu i Aikupito, ma o ia fo'i o le pele e to'atasi a Iakopo ma Rasela.

O le fanau a Iakopo na afua mai ai ituaiga e 12 o Isaraelu: Reupena, Simeona, Levi, Iuta, Isakara, Sepulona, Tanu, Nafatali, Kato, Asera, Iosefa, Peniamina. Manatua fo'i le folafolaga na folafola e le Atua ia Aperamo lea ua fa'ataunu'uina e le Atua i le fanau o Iakopo, lea ua tupu mai se nu'u tele lava ma fa'aigoaina ia Isaraelu.

### **A'oa'oga:**

O le ola fa'atalitali i le Atua e maua le tau lelei. Fanau, na fa'atalitali ma le onosa'i Iakopo i lana auaunaga ia Lapana, ona o lana filifiliga ia Rasela e fai mana ava. Na fa'ataunu'uina ma le manuia le loto onosa'i ma le fa'atalitali i le taimi o le Atua.

---

### **NOVEMA 18, 2018**

**MATAUPU 10:** Ia fa'afetai i le Atua. [*Aso Fa'afetai*]

**TUSI FAITAU:** Salamo 100: 3-5

**SINI:** Ia malamalama ma iloa lelei e le fanau le taua o le ola fa'afetai i le Atua.

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

### **Fesoasoani mo le Faiaoga:**

Fa'atalofa atu ia te outou le fanau i lenei taeao fou i le alofa ma le agalelei o le Atua, ina ua fa'asopolia mai lo outou soifua ma si o'u nei ola. A o le tatou mataupu i lenei taeao; "Ia fa'afetai i le Atua." Aisea e ao ai ona tatou fa'afetai i le Atua? [Fa'atali i le fa'asoa mai a le fanau.]

Silasila i le lau Salamo lea na tatou faitauina, e tele manatu o le au-su'eusu'e ia i latou na tusia ma fatuina lenei salamo. Ae o le a tatou fa'aaogaina le fatu pese lauiloa o le tupu ta'uta'ua o Tavita. O le tupu leni o Tavita, o se tagata ua masani lelei i le Atua. Fai mai o le tupu e iloa lelei lona Atua. E fiafia o ia e vivii ma fa'afetaia lona Atua e ala i pese ma viiga. A o'o fo'i i le taimi e sese ai le tupu o Tavita e iloa ona fa'amaulalo lona loto i le Atua.

Fai le fatu pese o mea nei e ao ona tatou fa'afetaia ai le Atua:

- [Salamo 100: 3]
  - “O ia na faia i tatou, na faia i tatou mona.”
  - “O lona nu’u i tatou.”
  - “O le lafu mamoe ua ia fagaina.”
- [Salamo 100: 5]
  - “Aua e lelei le Alii.”
  - “E fa’avavau lava lona alofa.”
  - “Eo’o atu lava lona fa’amaoni i lea tupulaga ma lea tupulaga.”

Ia fa’afetai i le Atua o Lē na faia i tatou i lona fa’atusa, ma ua fai fo’i tatou mona; o i tatou o ā le Atua ia, ma ua foliga fo’i i tatou i le Atua. Ia tatou fa’afetaia le alofa o le Atua e le mavae lea mo i tatou i aso uma o lo tatou ola. Fa’afetai i le Atua aua o lo’o tumau pea lona alofa ma lona fa’amaoni, mai lava i tupulaga ua mavae e o’o mai i ō tatou tupulaga, ma e fa’aauau e o’o I le fa’avavau.

### **A’oa’oga:**

Aua nei galo ona fa’afetaia le Atua i mea lelei ua ia faia mo i tatou. O mea nei e ao ona tatou fa’afo’i ai le fa’afetai i le Atua: o le ola tatalo, lagi ina o viiga tau i le Atua, tapua’i i le Atua i le agaga ma le fa’amaoni, ave ō tatou ola ia aoga mo le Alii ma lona finagalo. Ona le taumate lea o manuia o le a tatou mau mai ia te ia

## **NOVEMA 25, 2018 [SUEGA AOA O AOGA ASO SA]**

\*\*\*\*\*

### **TESEMA 02, 2018**

**MATAUPU 11: O Iesu i le malumalu.**

**TUSI FAITAU: Luka 2: 41-52**

**SINI: Ia malamalama tamaiti i mea na faia e Iesu i le 12 o ona tausaga.**

**Faiaoga #1:** Tatalo Amata/ toe fa’amanatu le mataupu le Aso Sa ua tuana’i/ fa’aailoa le mataupu o le asō/ fa’afeiloa’i tamaiti.

**Faiaoga #2:** Faitauina o le Tusi Paia/ fa’amalamalama ni upu e le malamalama ai le fanau.

### **Fesoasoani mo le Faiaoga:**

O le tatou mataupu i lenei taeao; ua fa’aulutalaina e fa’apea, “o Iesu i le malumalu.” Fai mai le molimau a le Evagelia a Luka; ina ua o’o i le 12 tausaga o le soifuaga o Iesu, na latou o a’e ai ma ona matua o Iosefa ma Maria i Ierusalem i le tausamiga o le Paseka. Ua mavae sauniga ma tapenaga uma o le paseka, ona toe fo’i lea o le to’atele fa’atasi ma ona matua o ē na latou malaga fa’atasi mai i le fa’amanatuina o le paseka, ma le lilo i ona matua e le o fa’atasi Iesu ma laua. Ina ua faia se malologa a le au malaga aua ua lata ina pogisa, sa atuatuvaile ma popole Iosefa ma Maria ina ua iloa mulimuli ane e le o i ai Iesu i le mea o lo’o i ai i la’ua.

Ua fesu’ega’i solo i le au malaga atoa ai ma ō la aiga ua le maua o ia. Ona toe fo’i lea o i la’ua i Ierusalem i le mea na fai ai le paseka e toe saili ia te ia. E tolu aso o saili o ia, ae maua mulimuli ane o lo’o i le malumalu ma a’oa’o o le lotu Iutaia.

Ua tau fai ofo i latou na i ai i le malumalu i le atamai ma le poto o lenei tamaitiiti 12 tausaga. Ina ua iloa atu e ona matua ua ofo i la’ua i lenei tama’i tamaitiiti, ae o lo’o filo ai i le mea o lo’o i ai tagata ua iloga i le tulafono aemaise o a’oa’oga a le lotu. E a’oa’o fa’a-le-agaga mai Iesu, ae manatu fa’a-le-tagata le tagata. Fai mai Maria [f.48]; “la’u tama e, se a le mea ua e fa’apea mai ai ia te i maua? Fa’auta, o i maua ma lou tamā sa ma saili lava ia te oe ma le tigā.”

Ae fa'afofoga la i le a'oa'o mai o Iesu i le fa'a-le-agaga [f.49]; "se a le mea na oulua saili mai ai ia te a'u? Luote le iloa ea e tatau ona ou i ai i le fale o lo'u Tamā?"

### **A'oa'oga:**

Fanau, aisea e tatau ai ona e i ai i le malumalu; [fa'atali mo se tali mai i le fanau]. Ioe sa'o lelei outou; e aoga e tatalo ai, mafuta ma le Atua, vivi'i ma fa'afetai i le Atua. Toaga e sau i le falesa po'o le malumalu o le Atua, aemaise le fale o le Faifeau, e le gata ina fa'apotoina ai oe ae maua ai fo'i le manuia mai le Atua.

### **TESEMA 09, 2018**

**MATAUPU 12: O Iesu o ia o le Emanuelu.**

**TUSI FAITAU: Mataio 1: 22-23**

**SINI: Ia malamalama le fanau le uiga na fa'aigoa ai Iesu o le Emanuelu.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

### **Fesoasoani mo le Faiaoga:**

O le tatou mataupu o lenei taeao; "o Iesu o le Emanuelu." Ua tatou tulalata nei i le fanau mai o le Mesia po'o le Emanuelu. O le tala o le a fa'amatalaina, na afua mai i se valoaga na valoia mai anamua e le au-perofeta. O le perofeta o Isaia o lo'o manino ai le upu lenei o le Emanuelu [Isa. 7: 14]. “

- **Perofeta Isaia:**

- Valoaga o le Mesia ma fa'aigoa o le Emanuelu.
- Vaolaga o le fa'aeaina ma le manuia e maua e Isaraelu pe a fa'atuatua ma tumau i le Atua.

- **Emanuelu:**

- O lona uiga; ua ia te i tatou le Atua. O lona uiga o le Atua e le toe mamao ma le tagata, ae o le a sili ona latalata i le tagata. O le isi ona uiga lata mai; o le Atua ua liu tino tagata, o le a feoa'i fa'atasi ma le tagata, tiga fa'atasi ma le tagata.

- **Iesu Kersio:**

- O le Alo o le Atua soifua.
- Ua fai ma sui o le Atua e liu tino tagata i le lalolagi.
- O le tama na valoia mai e le au perofeta
- O le uiga o le igoa o Iesu; "o le fa'aola/ savior.

Lea ua tatou tu lata nei i le vaitau ma le aso na taunu'u ai le valoaga a le au perofeta e uiga i le Mesia fa'aola. Fanau, o le uiga tonu lava lea o le aso na soifua mai ai lo tatou fa'aolale Emanuelu; "ua ia te i tatou le Atua."

### **A'oa'oga:**

O tatou e tofu uma ma igoa na fa'aigoa ai e o tatou matua ma tuaā, ma e tofu fo'i i taou ma le uiga o le igoa. Fa'apei ona fa'amatalaina mai e le Tusi Paia le uiga o le isi igoa o Iesu ma lona uiga, fa'apea fo'i i le suafa o Iesu. A toe fa'aupu la le tatou mataupu i lenei taeao, ona fa'apea lea; "ua ia te i tatou le Fa'aola. O le Emanuelu o lona uiga o le Atua ua lotolotoi faatasi mai i tatou, o le Atua ua sili ona latalata mai.

---

### **TESEMA 16, 2018**

**MATAUPU 13: Aso Kerisimasi**  
**TUSI FAITAU: LUKA 1: 26 – 38**  
**SINI: Ia malamalama le fanau i le uiga o le Kerisimasi.**

**Faiaoga #1:** Tatalo Amata/ toe fa’amanatu le mataupu le Aso Sa ua tuana’i/ fa’ailoa le mataupu o le asō/ fa’afeiloa’i tamaiti.

**Faiaoga #2:** Faitauina o le Tusi Paia/ fa’amalamalama ni upu e le malamalama ai le fanau.

### **Fesoasoani mo le Faiaoga:**

O le a le uiga o le aso Kerisimasi? O se aso fiafia i lagona ma manatu o le toatele; e le gata ina maua ai le avanoa e mafuta ai aiga, ae fa’aosofia ai lagona fiafia i le fefaasoa’i o meaalofa o le tasi i le isi. E tele nisi mea e manatu i ai le toatele i lea vaiata, ma ua aveese ai le uiga moni ma le taua o lea aso. Ua galo le taua o le aso na liu-tino tagata ai le Atua mo le lalolagi ina ia maua le olioli loloto ma lona filemū moni. O loo manino le upu “Kerisimasi” e sau mai le upu “Keriso”, o lona uiga “o lē ua fa’au’uina poo le fa’apaiaina/ o lē ua filifilia,” ma e ao ona fiafia ma alalaga tagata uma ona o lea ua afio mai le “Fa’aola.”

O le mau a Luka e ofoofogia lenei mea ua tupu, o le Atua ua fanau mai po ua liu tino-tagata e ala ia Iesu Keriso. Fai mai na alu ane Keperielu le agelu i le taupou o le aiga o Tavita; o Maria le igoa na faufautane ia Iosefa. Fai mai le agelu, [f.28, 30] “*si o’u alofa Maria le ua alofaina e le Atua, ua ia te oe le Alii. Aua e te fefe; o le a to oe, e fanau mai se tama tane, e te faaigoa foi o Ia ia Iesu.*”

Ua taunu’u folafolaga na fetalai ai le Atua i le feagaiga tuai ma le au perofeta ina ua fanau mai le Keriso. Ua fa’aalia ai le faamaoni o le Atua i Lana folafolaga mo le foafoaga ae maise le tagata. O le uiga moni lea o le upu “Emanuelu” ua ia te i tatou le Atua. O lona uiga pe a fa’amatalaina; ua afio mai le Atua e lotolotoi ma militino ma ona tagata. O le tama o le folafolaga lea na aui i le ie e Maria le taupou. O le tala e mafai ona faamatala ma toe faamatala pea, ae fou pea lona tāua ma le aogā o lenei mea na faia e le Atua mo le tagata.

### **A’oa’oga:**

O le mataupu ina ia faamumū ma faasusulu atu pea le fiafia ma le olioli loloto, ina ua fanau mai le Alii o le filemū. O le a sau tali atu i lenei mea mata’utia ua faia e le Atua mo oe ma a’u? Pe tau lava o le faamanatu pea i lea tausaga ma lea tausaga le fanau mai o Iesu i le lalolagi, a e leai sona taua loloto ia i tatou? O le uiga lea o le mataupu; ‘o le a le uiga o le Kerisimasi ia te oe?’ O le tunoa lea o le alofa o le Atua i lana foafoaga ae maise le tagata na Ia faia ua agasala.

.....  
***Malologa mo le Kerisimasi ma le Tausaga Fou (Tesema 23-Ianuari 13, 2019)***  
.....

**IANUARI 20, 2019**

**MATAUPU 14: O le Papatisoaga o Iesu.**  
**TUSI FAITAU: Mareko 1: 9-11**  
**SINI: Ia malamalama le fanau o Iesu na papatisoina e le Agaga Paia.**

**Faiaoga #1:** Tatalo Amata/ toe fa’amanatu le mataupu le Aso Sa ua tuana’i/ fa’ailoa le mataupu o le asō/ fa’afeiloa’i tamaiti.

**Faiaoga #2:** Faitauina o le Tusi Paia/ fa’amalamalama ni upu e le malamalama ai le fanau.

## **Fesoasoani mo le Faiagoa:**

O le mataupu o lenei taeao tamaiti, “o le papatisoga o Iesu.” Fai mai le molimau a le au-fai-evagelia, e muamua mai lē na te teuteua le ala o le Alii, ma o ia o Ioane le papatiso.

- Ioane le Papatiso
  - O ona matua o Sakaria ma Elisapeta
  - O ona ofu o le fulufulu o le kamela ma le fusi pa’u i lona sulugātiti.
  - O ana mea e ‘ai o sē akerise ma le meli vao ia.
  - O ia na taunu’u ai le valoaga a le Perofeta o Isaia. [Mareko 1: 2-3][Isaia 40: 3]
  - Tala’i atu le papatisoga o le salamō ina ia fa’amagaloina agasala a tagata.
  - E fa’atino lana galuega i le vaitafe o Ioritana.
- Iesu Keriso
  - O ona matua i le lalolagi o Iosefa ma Maria.
  - Na fanaua o Ia e le Agaga Paia.
  - Ae e le i amataina lana galuega tala’i, na maliu a’e o ia ina ia papatisoina.
  - Fai mai le molimau a le evagelia o Mareko, e tulaga ese lava le papatisoga a le Alii.
  - [Mk. 1: 10-11] ua masae le lagi ma ua avanoa ae afio ane ai le Agaga Paia i ona luga e peiseai o se lupe lona tino mai, aemaise ai le si’ufofoga mai le lagi ua fa’apea mai, “O lo’u atalii pele oe, ou te fiafia ia te oe.”

## **A’oa’oga:**

Fanau o i tatou ua uma ona papatisoina e faifeau i le papatisoga o le fa’atulutulu. O lona uiga o fa’amanuiaga mo lo tatou ola tuputupu a’e ina ia tutumau pea i le Atua lo tatou fa’atuatuga. A’o le papatisoga o le Agaga Paia o le mea foai fua le na a le Atua mo i tatou, e pei o le fetalaiga a le Alii o Iesu Keriso. “Ou te alu atu i lo’u Tamā, ae auina mai le Agaga Paia e fai ma fesoasoani sili ia te outou.”

.....

**IANUARI 27, 2019**

**MATAUPU 15: Ua filifilia so’o o Iesu. [Aso Sa Tupulaga]**

**TUSI FAITAU: Luka 5: 1-11**

**SINI: Ia malamalama fanau o le filifilia o le au-soo e tutusa ma le ola valaauina.**

**Faiagoa #1:**Fa’afeiloa’i tamaiti/ tatalo amata/ fa’ailoa le mataupu o le asō.

**Faiagoa #2:**Faitauina o le Tusi Paia/ fa’amalamalama ni upu e le o malamalama ai le fanau.

**Faiagoa #3:**Fa’amatalaina o le mataupu.

## **Fesoasoani mo le Faiagoa:**

O le filifilia o le au-soo a le Alii o le to’atele lava o i latou na filifilia o tagata fai faiva. O le molimau a Luka i lenei taeao i le mataupu e 5. Ua maliu atu le Alii o Iesu i le auvai o Kenesareta, a ua fetuleni po’o le tamomo’e ane le motu o tagata e fia fa’alogologo i le Afioaga a le Atua. Silafia lelei e le Alii le mea o lo’o tupu i le faiva a le au-vaa, o lea na ia maliu ane loa ma oso I le vaa a le tagata e igoa ia Peteru.

- Simona Peteru
  - O le tagata ua iloga i le gataifale po’o le fai-faiva. E leai se oga sami o i Iutaia e le masani ai lenei tagata.
  - Peitai na iso le iloa o Peteru i lea taimi ina ua uma lelei le po e leai se i’a o le faiva. [Luka 5: 5a.]

-O le vaega mulimuli o le fuaiupu e 5 ma le fuaiupu e 8 o lo’o atagia ai le fa’atuatua o Peteru [f.5b.] “A ona o lau fetalaiga ou te tuu ifo ai le upega.” [f.8] “Ona fa’apaū lea o ia i tulivae o Iesu, le Alii e, ina maliu ese atu ia te au, auā o a’u o le tagata agasala.”

- Iakopo ma Ioane  
-O atalii i la’ua o Sepetaio  
-E fa’apea foi i la’ua, ua lā talitonu ma fa’atuatua i le vavega na faia e le Alii i le latou va’a fai mai ua tāli goto.
- Iesu Keriso  
-E le gata ua a’oa’oina e le Alii, a ua fa’atepa fo’i i vavega.  
-[f.4] “Ina tuutuu atu ia i le loloto, ma tuu ifo ai ō outou upega e maua ai ni i’a.”  
-Ao le vaega mulimuli o le fuaiupu e 10, o lo’o atagia mai ai le valaauina o i latou e fai ma so’o o le Alii. [f.10b.] “Aua e te fefe, e amata i nei ona po ona e maua tagata.”  
-Fa’aaogaina e le Alii le agavaa fa’a-fai-faiva a Peteru, Iakopo, ma Ioane e fa’atino ai lana feau ma lana galuega.

### **A’oa’oga:**

Fanau o le filifilia e fai ma soo poo le ola valaauina mo Iesu Keriso e agavaa ai tagata uma. E le fa’apito augafa i le tauoloa poo le mativa e tutusa tagata uma i le Atua. O le tele ia o galuega a le Atua e fa’aaogaina ai lo tatou ola. E le faigofie le avea e fai ma so’o, tatou te fetaia’i ma tiga ma faigata o le soifuaga, ae pau le mea e faigofie ai o lo tatou fa’amoemoe ma fa’alagolago I le Atua i taimi uma. Fai mai le molimau a Paulo i le ekalesia i Filipi 4 ao lona fuaiupu e 13; “Ou te mafaia mea uma lava ona o ia ua fa’amalosi mai ia te a’u.”

---

### **FEPURARI 03, 2019**

**MATAUPU 16: Ole ulua’i vavega na faia e Iesu.**

**TUSI FAITAU: Ioane 2: 1-12**

**SINI: Ia malamalama fanau e i ai le mana fai vavega o Iesu.**

**Faiaoga #1:** Fa’afeiloa’i tamaiti/ tatalo amata/ fa’ailoa le mataupu o le asō.

**Faiaoga #2:** Faitauina o le Tusi Paia/ fa’amalamalama ni upu e le o malamalama ai le fanau.

**Faiaoga #3:** Fa’amatalaina o le mataupu.

### **Fesoasoani mo le Faiaoga:**

O le mataupu o lenei taeao, o le vavega na faia e Iesu. O le tala i le tausamaaga o le fa’aipoipoga na faia i Kana i Kalilaia, na auai Iesu ma lona tinā, fa’apea foi le au soo. Fai mai le tala e lei uma le tausamaaga a ua leai se uaina ua ma’ea, ona augani lea o Maria le tinā o Iesu ia Iesu sei faia se vavega e maua ai se uaina e fa’aaui ai le tausamaaga. E ui lava i le faigata o le mana’o o le tinā; o le mafuaaga lea o le fetalaiga a le Alii [f.4] “*Funa e, se a ea lau na ia te a’u.*” ae peitai na faia lava e Iesu ma le ususitai.

- Vavega na faia e Iesu.  
-[f.7-8] “Ua fetalai atu o ia ia te i latou, ina fa’atutumu ia o vai i suavai. Ina asu ane ia, ina ave i lē pule i le tausamaaga.” O le uluai vavega lea na faia e le Alii o Iesu i Kana i Kalilaia.
- Maria le tinā o Iesu  
-O le augani a Maria ia Iesu na mafua ai ona toe fa’aauiina tausamaaga o le fa’aipoipoga. [f.3] “*ona fai atu lea o le tinā o Iesu ia te ia, ua leai sa latou uaina.*”
- Pule o le tausamaaga  
-[f.9] “ua muamua mai le uaina leaga, ae mulimuli mai le uaina lelei. O mea lelei uma e saunia e le Alii mo le lelei o le tagata.

- Au-Soo  
-O le tausamaaga o le fa'aipoipoga na fa'atepa ai e le Alii o Iesu le au-soo i lona mamalu, ae le gata i lea na matuai fa'atuatua ai lava le au-soo i le Alii.

### A'oa'oga:

Fanau o le ola fa'atuatua i le Atua e fai vavega ai le Atua i lo outou soifua ma lo tatou ola. Tele ia o vavega na faia e le Alii o Iesu i le taimi a o i ai i le lalolagi. Fai mai le fetalaiga a le Alii mo tatou le au fa'atuatua; "tou te mafaia ona faia o vavega ma fa'amalolo ma'i i lo'u igoa ma le fa'atuatua mai ia te a'u." Ioe le fanau e mafai e i tatou pe a moni lo tatou ola ofoina atu mo le Atua ma lona finagalo.

---

### FEPURARI 10, 2019

**MATAUPU 17:** Ua vavao e Iesu le matagi.

**TUSI FAITAU:** Mataio 8: 23-27

**SINI:** Ia malamalama fanau o Iesu Keriso e fa'alogi ai le matagi ma afā

**Faiaoga #1:** Fa'afeiloa'i tamaiti/ tatalo amata/ fa'ailoa le mataupu o le asō.

**Faiaoga #2:** Faitauina o le Tusi Paia/ fa'amalamalama ni upu e le o malamalama ai le fanau.

**Faiaoga #3:** Fa'amatalaina o le mataupu.

### Fesoasoani mo le Faiaoga:

O le tala i lenei taeao ua fa'aulutalaina; "ua vavao e Iesu le matagi." Ua agai Iesu ma lana au-soo i le vaa e tofotofoina ai le ola fa'atuatua. Fai mai le molimau a le tusitala o Mataio, na ona o'atu a o Iesu i luga o le va'a tofa [moe] i totonu o le vaa. E le i leva ona tu'umuli ese atu le vaa, ae afātia loa i matagi malolosi. Ua oo ai lava ina lē mau le fa'atuatua o le au-soo.

- Au-Soo  
-Ua osofia le vaa i peau [galu-vai] o le vai ma ua oso ae ai lagona o le popolevale ma le fefe i le au-soo. [f.25] Ona o mai ai lea o ona soo, ua fafagu ia te ia, ua fa'apea mai, "Alii e, fa'aola mai, a matou fano."  
-Ua galo i le au-soo o Iesu lea latou te folau fa'atasi e pule aoao i natura o le foafoaga.  
-Ua leai se ola fa'atuatua i le au-soo.
- Iesu Keriso  
-O le fa'aola o le lalolagi uma, o loo ia te ia le pule aoao o le lagi ma le lalolagi.  
-O le tasi nei o tala o loo lu'i ai e le Alii o Iesu le ola fa'atuatua o le au-soo.  
-Ua fafagu e le au-soo o ia ao tofa, ma ua nofo ane loa le Alii I luga ma aoao atu le au-soo i le ola fa'atuatua, aua le fa'atuatua itiiti. [f.26] **"Se a le mea ua outou matatau ai, outou ē fa'atuatua itiiti."** Ua tulai o ia ma vavao i le matagi ma le vai, ona taufaifo lea o i latou.  
-O aoaoga fa'a-le-agaga a le Alii e maua'a ma mausalī ai lo tatou ola fa'atuatua i le Atua

### A'oa'oga:

Ia iloa e le fanau o le ola fa'atuatua i le Atua e mautinoa ai lona lumanai manuia. O le uiga o le fa'atuatua [Eperu 11:1] "Ao le fa'atuatua, o le fa'alagolago i mea ua e fa'amoemoe i ai, ma le mautinoa o mea e le o vaaia."

---

### FEPURARI 17, 2019

**MATAUPU 18:** Ua fafagaina e Iesu tagata e lima afe.  
**TUSI FAITAU:** Mataio 14: 13-21  
**SINI:** Ia malamalama fanau e leai se mea e faigata i le Atua.

**Faiaoga #1:** Fa'afeiloa'i tamaiti/ tatalo amata/ fa'aילו le mataupu o le asō.

**Faiaoga #2:** Faitauina o le Tusi Paia/ fa'amalamalama ni upu e le o malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O le mataupu o le asō, ua fafagaina e Iesu tagata e lima afe [5,000]. Fai mai le molimau a le tusitala o Mataio; i le taimi o le tau afiafi na o mai ai le au-soo ma fai i a Iesu, sei tuu ia le motu o tagata e o e fa'atau ni a latou mea e ai i nuu a tuaiona ua alu le aso, ma o le nofoaga tu'ufua foi o loo i ai i latou.

- Iesu Keriso  
-[f.16] “E le aoga ona latou o; ia outou avane ni mea latou te aai ai.” O le mea moni lava pe a tuu faa-le-maufau, ua fememea'i le au soo aua ua le iloa poo ifea se mea o le a maua vave mai ai se mea'ai mo lenei to'atele; peitai ua galo ia te i latou o Iesu lea latou te mafuta.  
-Na faia e Iesu le vavega i areto e lima ma ia e lua, [f.19] “Ona tago lea o ia i areto e limagafua ma i'a e lua lau, ua tepa ae i le lagi, ua fa'afetai; ua ia tofitofi foi i areto, ma avatu i le au soo, ona avatu ai lea e le au soo i le motu o tagata.”  
-e leai se mea faigata i le Atua, aua foi o le Atua e pule aoao i mea lelei uma lava.
- Au-Soo  
-Ua fememea'i ma le mautonu le au soo o lea ua aso atoa e le aai le motu o tagata. O le sa a'e ai se manatu ia te i latou e faatoga ia Iesu e fa'amatu'u le motu o tagata; “o le mea tuufua lenei, ua leva foi le aso; ia e tuuina atu le motu o tagata, ina ia latou o i aai e faatau ni mea e 'ai mā latou.  
-E atagia ai foi i le tala lenei le laititi o le ola fa'atuatua o le au soo, lea foi e atagia mai i le fuaiupu e [f.17]. Ona latou fai mai lea ia te ia, “E leai ni a tatou mea iinei, ua na o areto e lima ma i'a e lua.

### **A'oa'oga:**

Ia mausali ma mau a'a lo tatou ola fa'atuatua i le Atua soifua. O le mausali o le ola fa'atuatua e mautinoa ai lou lumanai. E fai vavega le Atua i le ola o le tagata fa'atuatua.

\*\*\*\*\*

### **FEPURARI24, 2019**

**MATAUPU 19:** O Iesu o le Ala, Upu moni, ma le Ola.  
**TUSI FAITAU:** Ioane 14: 1-7  
**SINI:**

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'aילו le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O a'oa'oga uma a Iesu e taulai i le malo o le Atua. O se tasi nei o ana a'oa'oga ua fa'amanino ai e Iesu; o ia o le ala i le malo o le Atua. E pei ona fa'aulutala ai la tatou mataupu i lenei taeao; “O Iesu o le ala [Jesus is the way].

- Iesu Keriso



-A'oa'o atu Iesu i le au-soo e fa'ataua i le malo o le Atua, e saofagā uma i ai tagata fa'atuatua. O le mafuaaga lea na fetalai ai o ia; "aua le atuatuvaale o outou lotou; a ia outou fa'atuatua i le Atua.  
 -Fetalai le Alii o Iesu; o le maota o le Atua e tele avanoa mo tagata uma. O totonu foi o a'oa'oga a le Alii, o loo afifi ai lona alofa mutimutivale, ina ia faasaoina uma tagata i le ola fa'avavau. [f.3] "Afai foi ou te alu ma sauni se mea e nonofo ai outou, ou te toe sau, ou te talia foi outou ia fa'atasi ma a'u."  
 naunautai ina ia maua e tagata uma le avanoa i le malo o le Atua.  
 -E a'oa'o fa'a-le-agaga atu le Alii, ae manatu fa'a-le-tino nisi o le au-soo.

- Toma  
 -Fai mai le fesili a le alii o Toma ia Iesu; [f.5] "Le Alii e, matou te le iloa le mea e te maliu atu i ai, matou te mafaia faapefea ona iloa o le ala."  
 -Ae fai mai le fetalai a le Alii o Iesu [f.6] "O a'u nei le ala, ma le upu moni, ma le ola; e le alu atu lava se tasi i le tamā, pe a le ui mai ia te a'u. E manino ma malamalama lelei fetalai a le Alii; a le tali e le tagata Iesu Keriso e fai ma Alii ma fa'aola i lona ola, e le sao i le ola fa'avavau.

### A'oa'oga:

Fanau i lenei taeao, e leai lava se tasi tatou te sao ai i le malo o le Atua. Ua na o Iesu Keriso le ala i le malo e fa'avavau. E manino lava le saunoaga ma fetalai a lo tatou Alii; a aunoa ma Ia e le mafai ona tatou sao i le malo o le Atua. Ae seiloga lava tatou te talia, talitonu, salamō ma faatuatua ia Keriso Iesu e avea ma Alii ma Faaola i ō tatou lotou ona mautino lea ua tatou saofagā i le malo e faavavau.

---

### MATI 03, 2019

**MATAUPU 20:** **Ia tu'u mai tamaiti e ōmai ia te a'u.**

**TUSI FAITAU:** **Mareko 10: 13-16**

**SINI:** **Ia malamalama le fanau le taua o i latou i le Atua.**

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### Fesoasoani mo le Faiaoga:

I se vaaiga i le aganu'u ma le agaifanua e vaaia ai le lē amanaiaina o tamaiti, ma e leai foi se faamuamua o i ai. E leai foi so latou leo i totonu o mea fai fa'a-le-nu'u. E foliga fa'apea foi le aganu'u fa'a Iutaia lea e atagia mai i le manatu o le au-soo. Fai mai le molimau a le Evagelia o Mareko ua o atu tagata ma latou fanau po'o tamaiti se i pa'i ma fa'amanuia i ai Iesu, ae ua vavao e le au-soo. [f.13b.] "***a ua vavao atu le au-soo i ē na aumaia.***"

- Iesu Keriso  
 -Ua tiga le finagalo o le Alii i le au-soo i le vaioa [taofi] o tamaiti.  
 -"***Ina tuu mai ia o tamaiti e ōmai ia te a'u; aua le vavao ia te i latou.***"[f.14b.]  
 -Fa'atusaina e Iesu Keriso o i latou o e sao i le malo o le Atua e fa'apei o le tamaitiiti. [f.14c.]  
 -Ona o tamaiti e sa'o ma mamā o latou lotou ma le mafaufau [purity]. O lona uiga a le mamā o tatou lotou e le mafai ona sao i tatou i le malo o le Atua.  
 -Fai mai le lauga fa'aamuia a Iesu i luga o le mauga i le molimau a [Mataio 5: 8] "***amuia ē lotou mamā; auā latou te iloa atu le Atua.***"

-E telē se a’oa’oga taua na faia e Iesu mo le au-soo ma tagata sa i ai; o le a’oa’oga e fa’atatau i le malo o le Atua lea e fa’atusa i ai e Iesu ia fa’apei o se tamaitiiti. [f.15] **“E moni, ou te fai atu ia te outou, Ai se le talia le malo o le Atua fa’apei o se tamaitiiti, e le sao lava ia i ai.”** O lona uiga e i ai le taua o le fanau i le soifuaga o lo’o tatou ola ma soifua ai.

-Ona mulimuli ane lea ua fa’aee i ai aao o le Alii ma fa’amanuia ia te i latou.

### **A’oa’oga:**

Aua nei fa’atauvaia ia te i tatou le tāua o fanau i totonu o aiga, nu’u, ma le ekalesia. E le gata o i latou o le tofi, ao le oloa tāua na foaiina e le Atua mo i tatou uma, e tausi ma fa’apelepele i ai.

---

### **MATI 10, 2019**

**MATAUPU 21: O le atalii fa’amaumau oa.**

**TUSI FAITAU: Luka 15: 11-32**

**SINI: Ia malamalama le fanau o le Atua o le alofa lava ia.**

**Faiaoga #1:**Tatalo Amata/ toe fa’amanatu le mataupu le Aso Sa ua tuana’i/ fa’ailoa le mataupu o le asō/ fa’afeiloa’i tamaiti.

**Faiaoga #2:**Faitauina o le Tusi Paia/ fa’amalamalama ni upu e le malamalama ai le fanau.

**Faiaoga #3:** Fa’amatalaina o le mataupu.

### **Fesoasoani mo le Faiaoga:**

O le tala i lenei taeao; o le fa’ataoto a le Alii i le tamā ma ona atalii e to’alua. O totonu o lenei tala o loo ta’atia ai le tele o ni mea tāua mo lo tatou ola a’oa’oina.

1. O le aganu’u fa’a-Iutaia e foliga tutusa ma le aganu’u fa’a-Samoa.
2. O le alofa fa’a-le-Atua [agapeitos] o le alofa e le uma.
3. O le lē iloa i le lalolagi ma le lē iloa i totonu o le aiga.
4. O le toe foi ma le loto ua salamō.

- **Ui’i po’o le tama laititi**

-mana’o e vavae mai lana vaega o le oa sei alu e pule ai ma su’e ai sona lumanai; a’o i tonu lava lea e atagia ai le aganuu fa’a-Iutaia. E leai lava se eseesega o le mana’oga a le ui’i ma lona mana’o loa ia oti le tamā. Aua o le vaeluaina o le tamaoiga i le aganuu fa’a-Iutaia o se aiga; seiloga lava ua maliliu le mātua ona mafai lea ona vaevaeina e le fanau. E fa’apea foi i le aganuu fa’a-Samoa e leai lava ma se eseesega ma le aganuu fa’a-Iutaia.

-Fai mai le molimau a le Tusitala ua alu le uii i le lalolagi ma fa’amaumau ai lana oa; ona mativa ai lea o ia. Ua ia alu foi ma nofo i le tasi tagata o le nuu, ma ua fai o ia ma auauna e fafagaina pua’a. O le vaega lenei o le tala o lo’o atagia ai le loto salamō, ina ua tupu lona mana’o i meaai a pua’a. [f.17]ona atamai ai lea o ia, ma fa’apea ane e le toatele ea auauna a lo’u tamā ua faulai a latou mea’ai i le laoi a’o a’u nei ua matelaina.

-[f.18-19]Ua ou agasala i lē oi le lagi atoa ma ou luma, e le aoga ona toe ta'ua o a'u o sou atalii, a ia avea a'u ma se tasi o au auauna. O le lē iloa o le uii i le lalolagi na fetaiai ai ma le tele o fa'afitauli ma puapuaga o le olaga, lea na fa'a-mativaina ai ma oo ai i se tulaga e sili ona maualalo.

- **Ulumatua po'o le tama matua**

-O le ulumatua e le i ole i se mea e tasi i lona tamā, sa nofo lava i le aiga ma fai le fatu-aiga. Peitai o loo leiloa le ulumatua i totonu o le aiga, e mafua ona e lei mafai ona ia fa'amagalo atu i lona uso laititi, aemaise lona ita i le tamā ona ua fa'amaumau le tele o isi tamaoiga e fai ai le fiafia i le uii fa'amaumau oa.

- **Tamā**

-Atagia ai le isi natura o le Atua; o le alofa. O le tamā e le fa'apito lona alofa, e laualuga ia te ia le alofa tunoa.

-E ui lava i le manao o le uii e alu ese ma le aiga, ae na alu ese le uii ma loimata alofa o le tamā.

Talitonu sa nofo le tamā ma va'ava'ai mai i le ala poo afea e toe foi atu ai le uii; a lea e atagia mai i le **[f.20] “ua iloa mamao mai e le tamā, ona mutimutivale lea o lona alofa, ua momo'e atu o ia ma fusi ma sogi ia te ia.”** O le fa'aalia o le alofa fa'a-le-Atua lea e atagia mai gaioiga a le tamā.

-E tutusa lelei le alofa o le tamā i lana fanau, ua le ese ia te ia le uii ma le ulumatua. Lea na ia fa'atino foi i le ulumatua ina ua le alu atu o ia i totonu o le fiafia, na agai mai i fafo lona tamā ma fa'aoleole ma fa'amalie ia te ia ma fa'apea atu **[f.31] “Ta e, ta te nonofo pea ma oe, o a'u mea uma foi, o au ia.”**

### **A'oa'oga:**

Fanau o le alofa fa'a-le-Atua o loo atagia i o tatou mātua, i le tausiga ma le fa'afaiileleina o i tatou ina ia ola fiafia. E musu ina nei tatou ūa fālōlō, o le mafuaaga le na e ala usu ai e faigaluega ae a lo tatou mana'o ina ia fa'amalieina. Manatua le alofa o matua e afua ona o le Atua e alofa ma alofa mutimutivale.

---

### **MATI 17, 2019**

**MATAUPU 22:** O ē galulue i le tovine.

**TUSI FAITAU:** Mataio 20: 1 – 16

**SINI:** Ia malamalama le fanau e tutusa uma tagata galulue ma lona tau i le silafaga a le Atua po o le Matai o le galuega.

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O le fa'ataoto i e na galulue i le tovine, o loo atagia mai ai le alofa le fa'atuaia o le Atua e ala i lana fa'aolataga. Ina ua faa-faigaluegaina e le matai tagata i taimi eseese o le aso, o lona alofa le faatuaia na totogi tutusa ai i latou. E foliga mai 'e le fetai (not fair),' mo nai tagata na muamua faigaluega i le aso atoa ma le mugalā. A e peitai ua faailoa ane e le pule sa malilie uma e maua le totogi mo le galuega; ae lei faapea e totogi e tusa ai ma le umi na faigaluega ai. Ua fa'atutusa e le matai totogi o tagata faigaluega uma, o ē na muamua ma ē na mulimuli ane.

Ua a'oa'o mai le Evagelia o Mataio e tutusa uma lava le tau i o le tagata e talitonu ma talia le faaolataga na saunia e le Atua e ala ia Keriso Iesu. Lea e atagia mai i le fuaiupu e [f.16] ***“E fa’apea ona muamua o e na mulimuli, e mulimuli foi e na muamua.”*** Auā o le faaolataga e le'i maua e le tagata ona o ana galuega lelei po o le umi foi ona galue, ae na maua i le tunoa o le alofa lē fa'atuaia o le Atua. O loo fa'aalia ai foi le pule aoao o le Atua i mea lelei uma na Ia faia e oo lava i o tatou tagata galulue. O loo atagia ai le masani o le soifuaga; e fua i le umi o le taimi galue a le tagata, peita'i o le Atua e silasila i le faamaoni o tatou galuega.

O loo fa'aalia foi le Matai o le galuega, e lē mana'o e nofonono pe faamaumau le taimi a le Atua. E le'i mapu foi ona Ia asia le galuega auā na te lē tuufau lana 'au faigaluega i isi tagata galulue. O le Matai e finagalo ia galulue tagata uma e manuia ai le ola. E laualuga ai lona manatu ia tau lava o le faamaoni o le galue e tau lava e tusa ai ma lana galuega. E ui ina manatu le toatele i le lē fetau i totogi ua avane e le Matai, e le'i suia ai lana faai'uga na faia ma le manino. Fai mai a ia, “e te faau'ū ea ou mata ona o lo'u agalelei. Ua silafia lelei e le Alii natura o tagata Iutaia o lona vaitau, ua latou manana'o e maua filemū le faaolataga ma ua manatu faapito mo i latou lava.

### **A'oa'oga:**

O se a'oa'oga mo i tatou le fanau, aua le fa'amasani e galue mo se tau. Ae maise galuega faa-le ekalesia pei o fai-aoga Aso Sa, ta'ita'i o Autalavou, aufaipese ma isi punavai e le totogia ia galuega peita'i e fai ma le loto atu o loo silafia e le Atua. Ia saili muamua le Atua ma lona finagalo, ona faamanuia lea ma maua le lumana'i manuia tatou le fanau mai le Alii.

\*\*\*\*\*

### **MATI 24, 2019**

**MATAUPU 23: O le Atua o le leoleo mamoe lelei.**

**TUSI FAITAU: Salamo 23**

**SINI: Ia malamalama tamaiti o le Atua na te leoleoina i latou i aso uma.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O le tasi leni o Salamo o loo ta'ua o le salamo a le tupu o Tavita. O loo faamatala ma lagi fa'a-pese ai e le Fai-Salamo o Tavita le Atua o le leoleo mamoe lelei, fa'amatalaina ai le isi natura o le Atua; o ia o le leoleo mamoe lelei.

- **Tavita**

- O Tavita o le tupu lona lua o Isaraelu i le fa'asologa o tupu o le malo, na filifilia e le Atua mai le fanau a Iese, ma o ia foi o le leoleo mamoe i le lafu a lona tamā.

- Na fa'au'uina e le perofeta o Samuelu e fai ma tupu o Isaraelu e sui tulaga ia Saulo.

- O le taleni a Tavita o le fatu pese poo le musika i le gagana fa'aona po nei. O lana foi lea masani e fiafia e vivii ma fa'afetai i le Atua.

- O le tupu e iloa fa'amaulalo i le Atua, o le ala foi lea na fa'aeaina ai e le Atua.

- **Atua**

- O upu o loo suitulaga i le suafa o le Atua, poo upu o loo fa'amatala ai e le Fai-Salamo o Tavita le Atua lea e vivii ma fa'afetai i ai.

1. Leoleo mamoe

2. Ta'ita'i

-O le salamo o loo iloga ai le puipuiga ma le saogalemu o le ola o le tagata i aao fa'aola o le Atua. E le gata ina leoleo e le Atua, a ua ta'ita'iina foi ma malutia i aao agalelei o le Atua.

-E oo lava i le taimi na lamatia ai le ola o Tavita e le tupu o Saulo na leoleo lava e le Atua. [f.4] ***“Eui lava ina ou savali i le vanu o le ata o le oti, ou te le fefe lava i se mea leaga; auā o oe ta te fa'atasi ma a'u; o lau laau ma lou tootoo e fa'amafanafanaina ai a'u.”***

### **A'oa'oga:**

Fanau, e leoleo le Atua i lo tatou ulufafo ma le ulufale, auā a mautinoa ma mausalī le fa'atuatua o le tagata i le Atua, ona leai lea o se fefe lava i se mea leaga; auā o loo mautinoa lona saogalemu i aao leoleo o le Atua Soifua.

.....

**MATI 31, 2019**

**MATAUPU 24: O le Atua o lo'u lafitaga.**

**TUSI FAITAU: Salamo 18: 1-2**

**SINI: Ia malamalama tamaiti o le Atua tatou te sulufai i ai i taimi o puapuaga.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'aailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O aso ia i taimi o le taua lona lua o le lalolagi [World War II] sa tele i laufanua o Samoa o 'olo sa lalafi ai fitafita ae a lo latou saogalemu. E oo foi i le tele o malo o le lalolagi e atia'e pa maualuluga e puipui ai le aai aemaise le saogalemu o tagata. O le laumua o Isaraelu Ierusalem e si'omia e le pa maualuga e puipui ai le ogatotonugalemu o le fatu o le Isaraelu o le malumalu, aemaise le maota e nofo ai le tupu filifilia. O le fa'amoemoe maualuga o le Isaraelu o le Atua o lo latou olo e malu ai, e mafua ona manatu fa'apea tagata o le Isaraelu ona o le feagaiga osia a le Atua ma augatamā o le tuana'i. “E avefa le Atua ma o latou Atua, ao latou ma nuu o le Atua.”

- **Atua**

-O le Alii o le malosi-O le Alii o le papa-O le Alii o le 'olo maualuga-O le Alii o le fa'aola-O le Alii o le Atua-O le Alii o le talita-O le Alii o le olataga

O fa'atusa ia o loo fa'amatalaina ai e le Fai-Salamo le malosi o le Atua lea e tapuai ai le Isaraelu. Le Atua e fai ma papa, 'olo maualuga, talita, olataga, ma fa'aola i le soifua ma le ola o le tagata fa'atuatua. O le Atua e malu ai le tagata i taimi o faigata, aemaise lava taimi e lama ai e le fili lo tatou ola; pei o taimi ia tatou te moomia ai le fesoasoani o le Atua.

### **A'oa'oga:**

Tamaiti ua na o le Atua tatou te maua ai le olataga i aso uma e le aunoa. A oo ina lutia i tatou i puapuaga o le soifuaga, ona tatou sulufai lea i aao fa'aola o le Atua. Aua e le mafai ona tu'ulafoaina e le Atua ona tagata. Fai mai le Fai-Salamo; ***“o le Alii o lo'u papa ia, ma lo'u 'olo, ma lo'u fa'aola; o lo'u Atua, o lo'u papa, ou te fa'atuatua ia te ia; o lo'u talita, ma le nifo o lo'u olataga.”***

\*\*\*\*\*

## **APERILA 07, 2019**

**MATAUPU 25: O le Atua o lo tatou malamalama.**

**TUSI FAITAU: Salamo 27: 1**

**SINI: Ia malamalama tamaiti o le Atua tatou te sulufai i ai i taimi o puapuaga.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O lenei tusitusiga poo lenei pese o loo auau fa'atasi ai le to'atele o le au-su'esu'e o le Tusi Paia e fa'apea; o le tupu o Tavita na ia lagiina lenei vi'i i le Atua, e mafua ona o fa'aupuga o loo tusia ai lenei pese. Fa'amamafaina i le asō le "o le Atua o lo tatou malamalama."

- O le Atua.
  - O ia o le malamalama o le lalolagi, le ala foi lea o le fa'amoemoe o le tupu o Tavita i le Atua.
  - O le fa'atusa o le malamalama o loo fa'amatalaina ai e Tavita le Atua; o le molī, o le la, masina, fetu, molī ga'o.
  - O le natura ta'atele i le soifuaga o le tagata; o le mata-fefe poo le fefe i le pogisa, aemaise lava le fanau. Ao le fa'amalosi lea o le tupu o Tavita lea e atagia mai i le fuaiupu e muamua e pei ona fa'aaogaina i lenei taeao. [f-1.] "O le Alii o lo'u malamalama ia, ma lo'u olataga; o ai se ou te fefe ai?"
  - O le Atua o lo tatou malamalama ia, e mafai foi ona tatou fa'apea "o le malamalama o le fa'aolataga [light is a salvation]. Aua o le mea moni lava, sa o tatou i ai i le pouliuli anamua, peitai na fa'amalamalamaina ma
  - E fai o ia ma malamalama i o tatou ala uma, na pau lava le mea tatou faia o le fa'atuatua ia te ia, ona faia lea e le Atua.

### **A'oa'oga:**

Fanau e le fiafia le Atua i le pouliuli; manatua foi le amataga o le lalolagi fai sa pogisa ma gaogao, ae na fa'asusulu i ai e le Atua lona malamalama mo le lalolagi. Aua foi le fa'apopoleina i tatou

.....

## **APERILA 14, 2019**

**MATAUPU 26: O le Atua o lo'u talita.**

**TUSI FAITAU: 2 SAMUELU 22: 26 – 34**

**SINI: Ia malamalama tamaiti e mafai e le malosi o le Atua ona avea ma talitā, e saogalemū ma malu puipuia lana fanau.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O lenei taeao ua faaaogaina le ‘talitā’ e tau faamatala ai nisi natura vaaia o le Atua. O le talitā pei ona silafia, o se tasi lea o meatau po o se aupega a le fitafita e fa’aaoga i le taua. O le tāua o le talitā e lafi ma álo i ai le fitafita mai mea-tau a le isi áutau. O lona uiga e tataua ona malosí, ma ia malu puipuia ai le tino atoa o le tagata tau. E ao foi i le tagata tau ona faalagolago i lana talitā e lafi, ma puipuia mai ai lona tino i osofai’ga o le taua. O nai aogā ia o le talitā, ae le mafai ona faatusatusalia i le Atua, ae mo le mataupu lava ia i le silafia e le fanau o le isi lea natura vaaia o loo fa’amatala ai e le tupu o Tavita le Atua.

Fai mai le molimau o i le tusi a Samuelu 22: 31, **“o le talitā o Ia i e faatuatua uma lava ia te Ia.”** O le fitafita ua masani ma le taua, nate fa’aaoga tatauina mea tau e tusa ai ma le taua e tete’e atu ai le fili. Ua sala i le pese o le tupu ona o le Atua ua mafai ai ona a’e malo faiva. O le pese a Tavita ua mautinoa ai lona manumalo na afua mai le Atua, ua malu puipuia ai lona ola aemaise lana ‘autau. O le faaolaina o le nuu ua tigaina, fai mai le molimau o le tusi o Samuelu, ua sa’oloto le ola ua mautinoa ua malu puipuia i áao o le Atua. O le pese a le tama Eperu ina ua tunoa le alofa o le Atua, fai mai a Tavita, **“e te amio alofa Oe i le ua alofa; e te amio tonu Oe i e ua amiotonu.”** O le tau faamatalaina e le fitafita tau ua faasaoina le ola e le talitā a le Atua. E oo foi i ona fili o e ua fa’amauululuga ua silasila i ai le Atua ma ua fa’amaulaloina i latou. O le pule áoao a le ta’ita’i áu a Isaraelu lele ua fai ma o latou talitā e sulufa’i i ai a’o puapuagatia. Ua faailoa mai e le tusitala, le olaga e le asa ma fitā ma puapuagā e fetaia’i pea ma le tagata tau a le Atua. A e ao ona tapena ma sauniuni e tete’e atu le fili e ala i le fa’aaogaina o le talitā fa’a-le-agaga, ina ia fa’asaoina mai ai lo latou soifua imalei ma togafiti a le fili.

### **A’oa’oga:**

E mafai foi ona tatou faaaogaina lea talitā e malu puipuia ai lo outou soifua ma le ola i lenei vaitau. E ao ona faatuatua ma talitonu i le Atua e malu ai i faigatā o lenei olaga. Ia avea le Alii ma tali pupuni po le talitā e tete’e atu ai le malosí o le fili. E ao ona faamasani i le talitā o lona uiga e tataua ona mafuta e le aunoa ma le Atua e malu puipui ai i tatou mai le fili o lenei lalolagi.

\*\*\*\*\*

### **APERILA 21, 2019**

**MATAUPU 27: Aso Sa Laupama.**

**TUSI FAITAU: LUKA 19: 41 – 44**

**SINI: Ia malamalama tamaiti na tagi Iesu ona ole alofa i ona tagata.**

**Faiaoga #1:** Tatalo Amata/ toe fa’amanatu le mataupu le Aso Sa ua tuana’i/ fa’ailoa le mataupu o le asō/ fa’afeiloa’i tamaiti.

**Faiaoga #2:** Faitauina o le Tusi Paia/ fa’amalamalama ni upu e le malamalama ai le fanau.

**Faiaoga #3:** Fa’amatalaina o le mataupu.

### **Fesoasoani mo le Faiaoga:**

O le Aso Sa Laupama e fa’amanatuina i tausaga taitasi, ma ou te talitonu ua silafia uma e le to’atele lona mafuaaga o le a aso. O le Aso Sa Laupama ua taua o le Malaga faa-tupu a le Alii. Peita’i, o le malaga mulimuli lea a Iesu i Ierusema. O le malaga na amata i le tumutumu o le mauga o Olivepei o le molimau a Luka. O le mea mautinoa ua leva ona silafia e le Alii le mea o le a tupu i le aai o Ierusema, aua foi o le Alii e silafia mea uma. Fai mai le molimau a Luka ua latalata atu Iesu i le aai ona tutulu ai lea o Ia. O le Alii ua maligi loimata ona o le alofa i le tauaso o tagata o lona lava nuu ma ua latou le faafeiloa’ia i lana malaga. O le tupu o tagata Iutaia na faatalitali i ai soo se Isaraelu, lele ua i faitoto’a a ua le amanaiaina. Aua o le manatu mauuluga sa i tagata; o loo fa’atalitali i se tupu na te lagaina le to’ilalo, se tupu e pei o Tavita. Ae galo ai le Alii lea ua afio mai i lona mamalu e asiasi ona laufanua ma ona tagata.

Ua tagi tautala le Alii ma faapea ane, **“Ana e iloa, o oe lava i lenei lava aso, o mea e manuia ai! A o lenei ua lilo i lau vaai... auā ua le iloa e oe ona po ua asia mai ai oe.”** Talofa i le Alo o le Atua ua tu’ua lona mamalu ma lona nofoalii, ae afio mai i Ierusema e fai ma tupu o tagata Iutaia a ua leai nisi e faatalia. O le soifua o le

Alii na momoli mai ai le faaolataga a le Atua i le lalolagi, a’o lea ua le amanaiaina; sala la i le tutulu o le Alii ona ua le tau lau o le faamoemoe sa manatu i ai.

**A’oa’oga:**

E ese ma le leaga pe afai e le taliaina foi e o tatou tagata i lenei vaitau, lona afio mai i o tatou laufanua. Ia tatala o tatou loto e asiasi mai ai le tupu o le lagi ma lenei lalolagi. O le afio fa’a-tupu mai o le Alii o Iesu Keriso ua mautinoa ai lo tatou ala i malo. Iatatau faafeiloa’i ma talia lelei o Ia i le agaga maualalo ma le loto salamō ona manino le a o lo ta manuia e fa’avavau.

\*\*\*\*\*

**APERILA 28, 2019**

**MATAUPU 28: Aso Sa Toetu.**

**TUSI FAITAU: Ioane 20: 1 – 10**

**SINI: Ia malamalama tamaiti i lo tatou manumalo a’ia’i e ala i le Taea o le Toe Tu maio Iesu Keriso po o le Taea o le Eseta.**

**Faiaoga #1:** Tatalo Amata/ toe fa’amanatu le mataupu le Aso Sa ua tuana’i/ fa’ailoa le mataupu o le asō/ fa’afeiloa’i tamaiti.

**Faiaoga #2:** Faitauina o le Tusi Paia/ fa’amalamalama ni upu e le malamalama ai le fanau.

**Faiaoga #3:** Fa’amatalaina o le mataupu.

**Fesoasoani mo le Faiaoga:**

O le Toe Tu o le molimau ola lea i le ola ma le soifua o soo se kerisiano. E pei o le molimau a Ioane, o Maria le Makatala o le tinā na suia e Iesu lona olaga tuai i se olaga fou. O le ulua’i molimau lea o le Toe Tu manumalo o le Alii. O lona valevale alofa i le Keriso o le na mafuta a’o le’i fetaia’i ma ona puapuaga. O le Alii na sauāina, na puapuagatia ma fa’asatauroina na maliu ai lava ma tanumia i le manava o le éleéle, o lea na mafua ai ona usupo lenei tinā e asia lona Matai i le t’uugamau. Le tu’ugamau lea na ofoina ane e Iosefa le Aremataia sa foaina i le papa ma e le’i tanuina ai lava se tagata.

E ui i lagona o le fememea’i ma le lē mautonu atoa ina ua vaaia le ma’a sa i le gutu o le tuugamau ua fuliese. Ua amata ona popole le tinā ina ua avanoa le tuugamau ma ua leai le Alii na tanu ai. E le i toe fa’atali Maria ma ua momo’e ma ta’u atu le tala ia Peteru ma Ioane pei ona faitauina. O le tala masani i mea na tupu i lea taea o le tu’ugamau ua tuufua. Na pogisā pea i latou i le mea ua tupu, ae na mafuli manatu o le au soo ma Maria, ua aveeseina e nisi le tino o Iesu. Peita’i, o le taea lea o le manumalo o le Alii atoa ai ma le au fa’atuatua.

E ui ina faigatā ona talitonuina lenei mea ofoofogia o le toe tu mai o se tasi nai e ua oti, auā e le’i tupu muamua. O le Toe Tu manumalo mai o le Alii, o le fatu lea o le fa’atuatuga a le Au Kerisiano uma i le lalolagi. Ua Toe Tu mai Iesu ma ua manumalo i le oti ma le tu’ugamau, o lea ua manumalo a’ia’i ai foi ma e talitonu ma le fa’amaoni i le taea o le Eseta. O le Toe Tu o le Alii o le fa’avae mautū foi lea o le molimau o le Lotu Kerisiano i le lalolagi.

**A’oa’oga:**

E ao foi ona toe fa’atuina i tatou i le fa’aolataga lea i le Keriso Toe Tu auā ua toe fa’atuina ai i tatou o e ua faatuatua i lona maliu ma lona toe tu. Ua mautinoa foi o le oti e le o le i’uga lea o mea uma, o loo i ai pea lo tatou lumana’i i le ola e faavavau. O le taea o le Toe Tu ua fa’amanatuina ai le manumalo o le Alo o le Atua



mai le matuitui o le oti ma le tu'ugamau tu'ufua. O lea foi ua tatou manumalo a'ia'i pe afai tatou te talitonu ma salamō fa'amaoni i lona soifua na ofoina atoa mai ina ia tatou maua le ola ma maua atili ai lava.

\*\*\*\*\*

**ME 12, 2019**

**MATAUPU 29: Aso Sa o Tinā**

**TUSI FAITAU: Ioane 4: 1 – 27**

**SINI: Ia malamalama tamaiti o Iesu e malie ai le galala faa le-agaga o soo se tagata.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

**Fesoasoani mo le Faiaoga:**

I le amataga o le galuega tala'i a le Alii pei o le molimau a Ioane, ua amata foi ona i ai ma le au tete'e pei o le au faresaio ma tusiupu. O le ala lea o lona tu'ua o Iutaia a ua aga'i atu i Kalilaia. I le f. 4 fai mai, "e ao ona ui atu o Ia i Samaria." O Samaria o le laumua o le malo i Matū, na fa'atoilaloina e Asuria. E toatele i latou sa ave faa-tagata o taua i Asuria, a ua auina mai tagata o nu'uese e nonofo ma aumau i le laueleele o le Malo i Matū. O iinā ua tupu ai le fe-nofoa'i o tagata Isaraelu ma nuu ese ma ua maua ai le áu afakasi ma suiga o tu ma aga i fanua. O le ala lea na matua te'ena ai i latou e tagata o le malo i Saute po o Iutaia.

Ua malosi lava le fete'ena'i i le va o tagata Samaria ma Iutaia i lea vaitau. Ua oo foi i a latou tapuaiga na masani ai ona mafuta faatasi i Ierusalem, ua le toe malosi aua ua fai lava nofoaga tapua'i o Samaria latou i le mauga o Keresema, a'o Iutaia o le malumalu o loo i Ierusalem. O loo taua ai ma le vaieli lenei o Iakopo e latalata i le ala autu mo femalagaiga. Fai mai le tala e na o le taeao ma le afiafi e o ane fafine e utu-vai i lenei vaieli, peita'i o lea ua tupu ai le tala i le feiloaiga a le Alii ma lenei fafine agasala o Samaria.

Na silafia lelei e le Alii le galala faa le-agaga o lenei fafine sa nofo ma ia i le tele o aso. O lea na amata ai le talanoaga i le aisi atu i le fafine mo sina vai. Atonu ua lagona e Iesu le fia taumafa i se vai ona ua vevela foi le aso. Ae faate'ia le Alii i le tali ane a lenei fafine. O le tali i ala o le tulafono faa-le-tagata, e le mafai ona feavea'ia mea i le va o Samaria ma Iutaia. E le'i tuua e le Alii lenei fafine e ola ma ona faaletonu, auā o le anava lea o le Talalelei e mo tagata uma ua oo mai lava i Samaria le "Vaiola." Na utupupuina e le Alii le ola-galala faa-le-agaga o lenei tinā.

O le fafine ua alu ma faasalalau solo le tala lelei ia Iesu o le Mesia na valoia e tagata Iutaia. O le tinā ua pupula ona mata ina ua tali lelei lona galala faa le-agaga e le Alii o le ola. Ua utu le galala faa le-agaga o lenei tinā na nofo ma ia i tausaga e tele. Ioe, po o le a le agasala ma ni manaoga o i le tagata, e suia e le Alii manaoga ma fa'atumu lo tatou galala.. Ia maua se avanoa tatou te avatu ai le Talalelei i le lalolagi.

\*\*\*\*\*

**ME 19, 2019**

**MATAUPU 30: E i ai le Atua i mea uma.**

**TUSI FAITAU: Salamo 139: 7 – 10**

**SINI: Ia malamalama tamaiti i le tasi o natura vaaia o le Atua, e i ai o Ia i mea uma.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

**Fesoasoani mo le Faiaoga:**

O le tasi foi lenei o natura e iloa ai o le Atua e ou le mana, le malosi uma lava. E le mafai ona tatou fa'amuta le fa'amatalaina o le Atua i so tatou iloa po se malamalama, auā e mata'utia ma le Silisili ese o Ia. O le mataupu foi e fa'amamafa ai le talitonu o le tagata i le Atua, e mafai ona i ai i soo se mea pe faapea foi e i ai o Ia i mea uma. O lona uiga po o fea lava tatou te o i ai e tusa lava po o le alu ifo i seoli, fai mai le Tusi Paia 'o loo i ai lava le Atua i mea uma.'

E pei o la le fai-Salamo na te le mafai ona sola pe lafi mai le Agaga o le Atua. Ua o'o i tuluiga o le lagi, ua o'o lava i seoli o loo i ai foi le Atua auā o le Agaga lava Ia. Ua silafia e le fatu-pese le mata'utia o le Alii po o fea lava le maualuga o le lagi ma tuluiga o le sami o loo i ai lava áao alofa o le Atua i mea uma. E alu ea i fea ai lona Agaga? Ua matuā iso le iloa ma le malamalama o le fai-Salamo e saili se isi mea e le o'o i ai le Atua, peita'i, ua le mafai foi ona sola ai luma o le silafaga ati a le Alii. E faamanatu mai i o tatou tagata o loo i ai faatasi le Atua ma i tatou e le aunoa i soo se mea o lenei olaga.

O le pese a le fatu-pese ua manino i le "silafaga ati" a lona Atua. Ua faamatalatala mea uma na taumafai e sola ma lafi ai ae le mafai. O le auga o le mataupu, afai e i ai le Atua i mea uma, o lona uiga e le mafai ona tatou o ese mai ia te Ia i soo se taimi o lenei olaga. Ia faia mea uma ma le faaeteete pe afai o loo i ai lona Agaga i soo se mea.

**A'oa'oga:**

O se fa'amanatu taua i o tatou tagata galulue ina ia faamaoni i taimi uma. O loo silafia mea uma e le Atua pei ona i ai o Ia i mea uma ma taimi uma. Ua tele ina tatou fai i vaaiga faa-le-tagata ma faapea ane, "ailoga ua iloa e se isi?" O loo silafia e le Atua mea uma, e leai lava se mea e natia e le lia'iina i le ala, e leai foi se mea e tau faalilo na te lē silafia!

\*\*\*\*\*

**ME 26, 2019**

**MATAUPU 31: E le liu lava le Atua.**

**TUSI FAITAU: Roma 8: 35 – 39**

**SINI: Ia malamalama tamaiti e lē liliu ae tumau le Atua e oo i le faavavau**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

**Fesoasoani mo le Faiaoga:**

O le tumau po o le lē liliu, o se mea lelei lea mo le tagata soifua. O le mataupu e aoaoina ai fanau i le tasi o natura vaaia o le Atua o le tumau lea e lē liliu. O le mataupu o le asō, o loo tau fa'amatala ai nisi o le uiga po o natura vaaia o le Atua, "e lē liliu ae tumau," e oo i le fa'avavau. O le tasi o natura vaaia o lo tatou Tamā e fa'amausalī ai lo tatou ola fa'atuatua atu ia te Ia. O loo fa'amatala e le mataupu ni suiga o mea ua tatou masani ma vaaia i aso fai so'o o le olaga. E pei o suiga o mea óla po o manu, o laau e oo foi i o tatou tagata ta'ito'atasi. E foliga mai e leai se mea e mafai ona tumau i tulafono o natura o le ola o mea o lenei olaga. O lona uiga e faigata le tumau i se mea e lē liliu ona ua fai ma masani po o le natura e tutupu o mea o lenei lalolagi. Peita'i, ua a'oa'o mai le mataupu e ao ona tatou tumau e pei o le Atua e le liliu e oo i le fa'avavau.

I fuaiupu fa' ai'u o le mataupu o loo fa'amanatu mai ai Paulo i le tumau o le alofa o le Atua i o tatou tagata e le liliu e oo ile fa'avavau. Fai mai le Aposetolo, *“Auā ua ou mautinoa, e le mafaia e le oti, po o e malolosi, po o mea i nei ona po, po mea atālī, po o le mauluga po o le loloto po o se tasi mea na faia, e le mafaia e ia mea ona faate'aeseina mai i tatou i le alofa o le Atua, o loo ia Keriso Iesu lo tatou Alii.”* O le tagata ua mautinoa ma fa'atuatua i le Atua lona ola, e le mafai ona toe liliu ae tumau e oo i le fa'avavau.

**A'oa'oga:**

O lea foi se fa'amanatu taua mo i tatou le fanau i lenei taeao, ia taumafai e fa'alagolago i le galuega mana a le Agaga ina ia fa'atupu le malosi e tutumau ai i le alofa tunoa o le Atua i o tatou nuu, aiga ae maise o tatou tagata. E i ai le fuaitau e fa'apea, “e sui faiga ae tumau faavae,” ioe, o le fa'avae lena o loo tautala i ai Paulo mo le Kerisiano, o le fa'atuatua ma ola i le Keriso Toe Tu. Ia tumau ai ae aua le femoumoua'i auā e le o liliu le alofa mo oe ma a'u e oo i le fa'avavau.

\*\*\*\*\*

**IUNI 02, 2019**

**MATAUPU 32: E Alofa le Atua i Lou Aiga.**

**TUSI FAITAU: Kenese 18: 10 – 15**

**SINI: Ia malamalama tamaiti e alofa le Atua i o tatou aiga.**

**Faiaoga #1:**Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:**Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

**Fesoasoani mo le Faiaoga:**

O le faasinomaga o soo se tagata soifua lava o le aiga, o iinā foi e tupu a'e ai se moemoe fou i le ola o le tamaitiiti. E taua tele la i le fanau le ola i totonu o aiga, e talanoa lava tamaiti i o latou aiga i mea na ola a'e ai. E pei o le loto atoa o le fanau ua faavae ma atagia ai lea aiga ma lea aiga, a'o le taua lena o mafutaga i totonu o tatou aiga.

O le mataupu o lenei taeao e fa'avae i mafutaga i totonu o le aiga. O totonu o se aiga o loo i ai matua ma fanau, e i ai foi o latou tiute eseese ma matafaioi e ao ona fa'atino e iloa ai o le aiga maopopo. Ia maua le fetausia'i ma atagia le alofa o le Atua i mafutaga i le li'o o aiga. E i ai se manatu a mautū ona toto le fatu lea i fanau i le tuputupu a'e i totonu o aiga e le mafai ona toe te'aese ai le tama ma le teine ua a'oa'oina lelei i le alofa o le Atua, e faavae ma totogo a'e i totonu o aiga.

O le tala masani i le aiga na tatalo ma tali i lagi se tamaitiiti e soso'o ai le gafā ae maise le tautoga o fa'amanuiaga mai le Atua mo nei matua. Fai mai ua matutua i laua (ua 100 tausaga o Aperaamo a o Sara ua 90 tausaga), a e na fa'ataunu'uina lava fa'amanuiaga a le Atua na tauto ai ia Aperaamo mo se tamaitiiti e fai ma nuu tele ma e uluola lou aiga. E ui ina tau le talitonu le tinā o Sara, ae na fanau mai lava ia te ia le tama o le folafolaga o Isaako. O le alofa o le Atua namulimulita'i solo ia Aperaamo ma Sara se'i ma'ea ona fa'ataunu'uina folafolaga ma fa'amanuiaga mo lo latou aiga. O le alofa o le Atua e le liliu mo lea aiga e ui lava ina matutua i laua.

**A'oa'oga:**

O lea foi se fa'amanatu mo i tatou le fanau, ia alofa i lou aiga. Ia manatua ou matua ma nai ou tei i totonu o lou aiga, auā e alofa le Atua i aiga ta'itasi. Fai mai foi le pese masani, “a i ai Iesu i se aiga ua fiafia, ae a i ai satani i se aiga ua faamisa.” Ioe, e alofa tele le Atua i lo'u aiga faapea foi ma lou aiga. E le faigofie le ola a'e i totonu o aiga taitasi auā e eseese, peita'i ua silafia e le Atua meaalofa mo lea aiga ma lea aiga e tatau ai mo le aso ma lea aso. Ia manatua, ia matau lou aiga i le Atua ma tali ane i lona alofa pei ona faamanuia ai o tatou aiga.

\*\*\*\*\*

**IUNI 09, 2019**

**MATAUPU 33: Aso Sa Penetekoso**

**TUSI FAITAU: Roma 8: 1 – 17**

**SINI: Ia malamalama tamaiti i le Afio ifo o le Agaga Paia ua avea ma o tatou Fesoasoani Sili.**

**Faiaoga #1:** Tatalo Amata/ toe fa'amanatu le mataupu le Aso Sa ua tuana'i/ fa'ailoa le mataupu o le asō/ fa'afeiloa'i tamaiti.

**Faiaoga #2:** Faitauina o le Tusi Paia/ fa'amalamalama ni upu e le malamalama ai le fanau.

**Faiaoga #3:** Fa'amatalaina o le mataupu.

### **Fesoasoani mo le Faiaoga:**

O le tusi faitau o lenei taeao, o le tali atu lea i le fesili o loo tusia i le Roma 6: 1. Ae ao pea ona fa'amanatu ma faailoa i fanau le va'aiga na tupu i le aso tonu lenei e pei ona fa'amatalaina e le tusi o le Galuega 2: 1-20 ona faato'a fa'amalamalama lea o le mataupu lea. O se tasi o mea o loo fa'amanatu atu e Paulo i lana tusi, o le ola i le Agaga, o le ola fou lea ua ia Keriso. I le f. 1-3, o loo faaalai ai, o e uma ua ola ia Keriso ua lelei i latou ma le Atua ma ua fa'amamaina a latou agasala uma. Ua le toe saisaitia foi i latou i tulafono faa Iutaia, auā ua sa'oloto i latou e ala i le ta'ita'iiga a le Agaga o le Atua. Ua leai foi se malosia o fa'aosoosoga uma ma ua faaumatia ai le agasala.

O e uma ua talitonu ma faatuatua e ao ona tutumau ai i la le Agaga, a e aua nei toe loto atu i mea a le tino. Auā o le atoatoa o le amiotonu a le Atua e maua ina ua savavali i la le Agaga. O le loto atu i mea a le tino o le oti lea e pei ona fai mai le [f. 4-8]. E ui ina nofo aitalafu i tatou i le Agaga, ona ua saisaitia i tatou i tuinanauga o le tino (f. 9-17). A e i ai pea lo tatou so'otaga ma le Atua ma ta'ua ai i tatou o lana fanau moni ina ia tatou faatasi ma Ia i lona Malo e fa'avavau. Ua uma ona manumalo ai le Alii Toe Tu. Na Ia fa'ato'ilalo ai le agasala, a ua avea ai i tatou ma fanau a le Atua.

O le afio tumau o le Agaga Paia o le Atua i ai tatou ua loto tetele ai ma talitonu, poo a puapuaga ma faigata e oo mai ma fa'aosoosoga uma; e le toe mafai ona manumalo i ai tatou. Auā ua ia i tatou le Fesoasoani Sili o le Agaga Paia lea. O le Agaga ua liua o tatou loto vaivai, a e faalototeleina i tatou uma. Auā pe faapefea ona tatou toe faavaivai, ua faato'ilaloina e le Keriso mea uma ina ia avatu i tatou i lona mamalu ma lona Malo e fa'avavau.

### **A'oa'oga:**

Pe a tatou toe to manatu i le fetalaiga a Iesu i lona au soo, e o i Ierusalema e fa'atalitali ai le oo mai o le Fesoasoani Sili. Auā o Ierusalema lava na saili malosia i ai Iutaia e ala i le malosia fou mai le Atua. A'o le au soo o le Agaga Paia o le Atua ua liligi ifo i luga o i latou ma ua fa'a- lotototeleina ai mo le galuega. E fa'apea foi i tatou le fanau pe a tatou maua lea Fesoasoani Sili e le toe vaivai o tatou loto ma tumau i la le Agaga e fa'avavau. O le Agaga o le Atua e mafuta ma fa'amalosia i lo tatou vaivai i tami uma e le aunoa, auā o lo tatou Fesoasoani Sili mai le Atua lea.

\*\*\*\*\**Manuia Tele le Malologa a le Fanau!*\*\*\*\*\*

